

***ASO TOFI, 22 MATI 2018***

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**SAUNOAGA FAAFEILOAI A LE FOFOGA FETALAI**

**FOFOGA FETALAI:** Ou te faasilasila atu ua toe amatalia Taualumaga ma Galuega a le Fono Aoao Faitulafono.

**MALELEGA MAI LE AO O LE MALO**

*Na fofogaina e le Fofoga Fetalai le Malelega mai Lana Afioaga Mamalu, O Le Ao o le Malo.*

**“TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoao Faitulafono na te iloiloina ai le Tulafono Tau Faaofi ua faaalia i nei:

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunu (Nu.2) 2018.
2. Tulafono Tau Faaofi o Teuteuga o le Tulafono o le Faasologa o Tiute 2018.

**TUUINA ATU** i lou nei Lima i lenei aso 21 o Mati 2018.

(Sainia): **Tuimalealiifano Vaaletoa Sualauvi II  
O LE AO O LE MALO.”**

## FAASILASILAGA MAI LE TAITAI O LE MAOTA

*Na fofogaina e le Fofoga Fetalai le Faasasilaga mai le Taitai o le Maota.*

E tusa ai ma le Tulafono Tumau 100(2), ua tuuina atu nei le Faaaliga i le Fono Aoao Faitulafono mo le iloiloina o Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunu (Nu.2) 2018.
2. Tulafono Tau Faaofi o Teuteuga o le Tulafono o le Faasologa o Tiute 2018.

**TUUINA ATU** i lenei aso 21 o Mati i le tausaga 2018.

**(Sainia): Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi TAITAI O LE MAOTA.**

## ISI FAASILASILAGA A LE FOFOGA FETALAI

**FOFOGA FETALAI:** Malo le soifua malo le lagi e mama i lenei taeao fou i le paia o le Palemene aemaise foi o Faauluuluga o Matagaluega a le Malo, ae a le tapuaiga a Samoa.

## **TULAFONO TAU FAAOFI O TEUTEUGA O LE TULAFONO O PUIPUIGA MAI AAIFIAGA O LE TAPAA 2018 – faitauga faalua**

**Afioga Hon TUITAMA TALALELEI TUITAMA (Minisita mo le Soifua Maloloina):** Lau Afioga i le Fofoga Fetalai e talitonu o lea tu mai lagi le lagaali a Tamafaiga aua le usuai foi o lau Afioga ma le mamalu o lenei Maota i le toe faaaauauina o felafolafoaiga i luga o Tulafono Tau Faaofi mo lenei foi aso. E momoli atu le agaga faafetai ma e faaopoopo foi i le taulaga molia i le alofa ma le agalelei o le Silisili Ese.

Ae ua tulai atu lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Puipuiga mai Aaifiaga o le Tapaa 2018 i lona faitauga faalua, ma ou te fia tautala faamalamalama i ai.*

*Faaluaina e le Minisita mo Galuega, Felauaiga ma Atinae Eseese ma le Minisita mo Pisinisi, Alamanuia ma Leipa.*

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

**FOFOGA FETALAI:** E tapa ma le faaaloalo lau Afioga i le Minisita mo le Soifua Maloloina e malele ma saunoa.

**Afioga Hon TUITAMA TALALELEI TUITAMA:** Lau Afioga i le Fofoga Fetalai e laitiiti lava lenei Tulafono Tau Faaofi Teuteu ua tapenaina ona ua tatau foi ma ua alagatatau ma ua talafeagai foi ma lenei vaitau ona toe silasila lea i nai Teuteuga ina ia ogatusa ma le soifuaga ua i ai nei le soifuaga i lenei vaitau.

I sona vaiga lautele lau Afioga i le Fofoga Fetalai ma le mamalu o le Fonotaga, o le Tulafono o Puipuiga Mai i Aafiaga o le Tapaa 2008, o lo o faavae i luga o le Feagaiga Faava o Malo, lea e taua nei o le Framework Convention of Tobacco Control po o le FCTC, sa sainilima ai le tatuou atunu i le tausaga e 2003 ia ma o lea na faamamaluina i le tausaga e 2005.

O lea Feagaiga Faava o Malo lau Afioga i le Fofoga Fetalai, o se treaty i lalo o le faamalumaluga o le Faalapotopotoga o le Soifua Maloloina o le Lalolagi po o le World Health Organisation o lo o faapuupuuina i le WHO. Ma o se feagaiga foi ua taua i totonu o le Sustainable Development Goals aemaise lava o le SDG3A o le vaega o le soifua maloloina. O se taimi muamua lea ua faia ai se Teuteuga i le Tulafono o Puipuiga Mai le Aafiaga o le Tapaa 2008, ua tusa ma le sefulu tausaga talu ai ona toe iloilo lea Tulafono. E lua la ni vaega o lo o faamamafa i ai lenei Teuteuga, o le vaega muamua, ia o le taumafai lea e ala i lenei Tulafono ona ausia vaega o le Feagaiga Faava o Malo po o lea na ou taua o le FCTC or Framework Convention of Tobacco Control.

O lona lua, o le faia lea o laisene mo le faatauina atu o oloa tau tapaa. E fitu la ia ni fuaiupu o le Tulafono ua faia i ai le Teuteuga, ma o le vaega tele o le Teuteuga, o le faia lea o laisene mo le faatauina atu o oloa tau tapaa Tobacco Licensing. O le Teuteuga muamua la lau Afioga i le Fofoga Fetalai ma le mamalu o lenei Fono, o lo o i ai lea i le Fuaiupu e 2 o lo o faamatalaina ai le uiga o upu. Muamua, o le faaupuga o 1 e ona le galuega po o le employer, ia aofia ai ma le faaupuga, 1 e ona pisinisi tau pasese, po o public transport.

O lona lua, oloa tau tapaa po o tobacco product, ina ia aofia ai ma tapaa faaonaponei, lea e taua electronic cigarettes, ona e le o i ai i totonu o le Tulafono Autu o le 2008 ia ituaiga sikareti a o lea ua aliae mai i onaponei a o le ua agai foi i ai le taumafaiga a i latou e gaosia ia tapaa ma Tobacco Products ia le i ai o nei ituaiga sikareti o lo o ua amata ona faaaogaina e nisi ma e talitonu foi e oo ina faagasolo mai i le tatou atunu i se taimi e le o mamao. Ua atoa ai ma faaoifiina o upu fou po o fuaitau fou i totonu o le Tulafono. O ia fuaitau foi e i ai ia tagata e tufatufaina atu po o distributors pusa sikareti lea o lo o faaperetaniaina o le carton, auina mai i totonu import, laisene licence, 1 e ona le laisene licensee, Komiti mo le Puipuiga mai Aafiaga o le Tapaa, National Tobacco Control Committee, totogifuapauina prescribed fee, tagata e nofoia nofoaga occupier, kamupani po o pisinisi o oloa tau tapaa tobacco industry.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

O upu nei, e le o i ai ni faamatalaga i totolu o le tatou Tulafono Autu ma e manomia ina ia aua ne i i ai se feteenaiga ia pe fesiligia faamatalaga o uiga o ia upu, ma o lea la ua tuuina ai i totolu o le Teuteuga lenei o le Tulafono e ala lea i le Tulafono Teuteu e pei ona o lo o tagofia nei e le mamalu o le Fonotaga.

Ua aofia ai foi i lenei Tulafono Teuteu le Teuteuga o le Fuaiupu e 7, ua faaofiina ai i totolu le Fuaiupu 7A, ina ia faavae ai se Komiti mo le Puipuiga Mai Aafiaga o le Tapaa National Tobacco Control Committee. O lo o i ai ma galuega tauave a lenei Komiti, ia o sui o Matagaluega ma Faalapotopotoga eseese a le Malo lea o lo o faapea foi ma Faalapotopotoga Tumaoti o lo o aofia ai i totolu o lenei Komiti, o lo o i ai foi ma aiaiga o lenei Komiti e pei ona manaomia le toavalu o sui o le Komiti nei e agavaa ai e faatinoina se fonotaga, e tatau ona fono faafa i le tausaga, ma e tatau ona aumaia le lipoti ma lipoti mai le Komiti lenei i le Minisita o le Soifua Maloloina i quarterly periods po o tai kuata tausaga e ogatasi la ma le fuafuaga lea i a latou fonotaga e tatau ona faafa i le tausaga.

O lo o i ai foi i lenei Teuteuga, le Teuteuga o le Fuaiupu 18, o le 18 o le soloia o le Fuaiupu 18(1)(a) o le Tulafono e tusa ma le vaega 13 o le Feagaiga Faava o Malo po o le Framework Convention on Tobacco Control. O lea vaega o le FCTC ia o lo o taua ai e faapea, no advertising sponsorship and gets in relation to tobacco products and the tobacco industry. O le aveesea lea o faalauiloa o pusa tioata o oloa tau tapaa o lo o i totolu o faleoloa i le taimi nei. O le tatou Tulafono i le taimi nei, o lo o aiaia ai le faasaina o ni faasalalauga po o le faalauiloa o le sikareti ae faataga ai ia pusa tioata laiti lea e vaaia i totolu o faleoloa e tuu ai i totolu sikareti e iloa atu lava e tagata faatau. I lalo la o le feagaiga lea FCTC lea na tatou sainia, lea la ua toe fai ai le suiga lea e teuteu ai le tatou Tulafono, ina ia aua ai ne i faailoaina le sikareti ma aveesea ai la ia le pusa lea e masani ona tuu ai sikareti i totolu ia aua ne i iloa atu e tagata faatau aemaise foi o a tatou fanau laiti.

O le Teuteuga o le Fuaiupu 21, o le a soloia ai le fuaiupu 21(3) o le Tulafono e tusa ai ma le vaega 13 o le Feagaiga Faava o Malo po o le Framework Convention of Tobacco Control lea na ou tolaulauina atu i le faaperetania. O le aveesea lea o tau pau mo se fefaatauaiga masani po o tupe toe faafoi masani tau fefaatauaiga, lea e tau o normal trade discount and rebates. O oloa ia tau tapaa ona e faasa ona faia ni faalauiloa po o promotional discounts i oloa tau tapaa e tusa ai ma le Feagaiga Faava o Malo lea ua uma ona tatou sainia.

O lo o i ai foi le Teuteuga lau Afoga i le Fofoga Fatalai i le Fuaiupu 23, o le faaofiina o le Fuaiupu 23A ina ia faasaina ai le tagata e i lalo ifo o le 21 tausaga le matua ona ia faatauina atu ia le sikareti le tapaa ia po o tobacco products. O le tatou Tulafono o lo o i ai nei, o lo o faasaina ai le faatauina mai e se tamaitiiti e i lalo ifo o le 21 tausaga se sikareti mai se faleoloa, ae le o faasaina le faatauoloa, e le o aiaia ai tausaga o le o lo o faatauoloa.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

O le suiga la lea o le Tulafono po o le Teuteuina, e le gata e le mafai e i latou e 21 tausaga po o lalo ifo ona faatau mai sikareti ae ua puipuia ai foi ma le faasaina o i latou e latou te faatauina atu po o le faatauoloa ia aua ne i lalo ifo o le 21 tausaga. E le o lavea ai ia le faatauoloa lea e 21 tausaga i le Tulafono o lo o i ai nei ae o lea la ua fai le Teuteuga lea ina ia faamalosia ai ia lena tulaga.

Ua teuteuina foi le Fuaiupu 24 lau Afioga i le Fofoga Fetalai, i le faaofiina lea i totolu o le Fuaiupu 24 (2a) ina ia mafai e le Faatonu Sili ona faatonuina le mamafa ma le tele o le sikareti po o sikareti taitasi i totolu o se pepa sikareti e mafai ona faatauina atu.

O le taimi nei, ia ua popoto foi ia fale gaosi sikareti e gaosi tapaa e faalapopoa a latou sikareti ina ia faafagifofie ai ona taulia pe alumia ai ia latou sikareti. Ae o le aiaiga la lea e i lalo o le Tulafono, o le a tutusa uma ai lava sikareti, e tatau ona i totolu po o sikareti taitasi e faatauina atu le lapopoa e faapea foi ma le latou mamafa.

Lau Afioga i le Fofoga Fetalai, o lo o i ai foi le teuteuga i le Fuaiupu e 29. O le isi teuteuga o le faaofiina i totolu o le fuaiupu 29(a) ina ia mafai ai ona fai suesuega po o shadow testing, o oloa tau tapaa ae e totogi lava e le fale gaosi tapaa ia ia suesuega. E siaki ai foi po o faamaoni lipoti o lo o tuuina mai i le Matagaluega i tausaga taitasi.

O lo o i ai foi le teuteuga i le vaega 5(a), lea e aiaia ai le laiseneina o le faatauina atu o oloa tau tapaa, o le faaofiina o fuaiupu....

**Tofa Lealailepule Rimoni Aiafi ( Faleata Sisifo):** Lau Afioga i le Fofoga Fetalai....

**FOFOGA FETALAI:** Se i malie lau Afioga i le Minisita, se i tulai mai ia le faauilavea la e.... se i fai atu muamua le fautuaga a le Nofoa, o lea tatou te le i see atu i mea taitasi i iloiloga auiliili o le Tulafono, ia ona faapena lea ona saunoa i mea taitasi lau Afioga, ae manatu i itu aoga itu taua o le Tulafono ona o le manatu i le tatou galuega, ae ui i lea se i tuu atu le avanoa i le sui usufono o Faleata Sisifo.

**Tofa Lealailepule Rimoni Aiafi:** Ia faafetai i lau Afioga o le ala foi lea o le tulai atu i le Afioga i le Minisita. Pei lava ona silafia, na fai atoa lenei mea nei i le Aso Gafua i le tatou workshop a lailoa le Afioga lea ua tatou malamalamala, ae tuu mai se avanoa se i fai atu ai ni nai fesili pe a tusa ai ma le finagalo ma le faaaloalo faafetai.

**FOFOGA FETALAI:** Ia, pei e faapena se lagona o le Nofoa e faamalulu atu, sa faamanino e le Pule Sili ia le tulaga o le mataupu lea, ae leai foi se malosi o le Nofoa e taofi ai lou finagalo e toe faamalamalamala ia ae fua i le tatou taimi. Se i tulai mai lau Afioga.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

**Afioga Hon TUITAMA TALALELEI TUITAMA:** Lau Afioga i le Fofoga Fetalai, ia, afaí o le lagona lea o le Maota, ia ua maea foi la ia se.... faafetai tele, ia o le teuteuga lena lau Afioga o le Tulafono ma le faaaloalo.

**FOFOGA FETALAI:** Ia, o le galuega lava e fua foi i le fesoasoani a le Malo ina ia faafaigofie le tatou galuega.

**Tofa AUMUA ISAIA LAMEKO (Falealili Sisifo):** Lau Afioga i le Fofoga Fetalai...

**FOFOGA FETALAI:** Ia, se i tulai mai ia le sui usufono mo Falealili Sisifo.

**Tofa AUMUA ISAIA LAMEKO:** Faafetai i lau Afioga i le Fofoga Fetalai mo le avanoa i lenei taeao. Faafetai foi i le alofa ma le agalelei o le Atua ua taitaiina mai lo outou soifua ma si ou ola i lenei taeao.

E puupuu lava se manatu e faatatau i lenei Tulafono Tau Faaofi o Teuteuga o le Tulafono o Puipuiga Mai Aafiaga o le Tapaa 2018. O le vaega muamua lau Afioga, e na o se tuualalo lau Afioga i le Minisita ma le Matagaluega, e faatatau lea i le Komiti o le Malo i puipuiga i aafiaga o le tapaa. E le o i ai se sui o le Faalapotopotoga o le au Gaosi Oloa i totonu o le... ia manatua foi o le tatou tapaa lea, e gaosi i totonu o Samoa, e lua ia tatou fale gaosi tapaa o lo o i ai. E fautuaina le i ai foi le sui o Faalapotopotoga o Pisini le Samoa Chamber of Commerce, aua o tulaga tau pisinisi.

O le vaega lona lua lau Afioga i le Fofoga Fetalai, o lo o taua i le teuteuga lenei ia le aveesea o le Fuaipu lea 21(3). Atonu mo le silafia e le Matagaluega o le tele o le aafiaga o le vaega lenei 21(3), ona o le Tulafono tuai, lea sa faatagaina ai le tuuina atu o rebates po o discounts i ai latou, latou te tufatufaina atu le tapaa.

I lau sailiiliga sa fai, ua mautinoa ai, e tele le aafiaga i tagata faigaluega o lo o faafaigaluegaina i lalo o le vaega lea. I le taimi nei, e lua a tatou vaega distributors lea o tagata latou te tufatufaina tapaa i Upolu, lua Savaii. Ae i totonu o kamupani ia, o lo o faafaigaluega ai foi ia tagata e o e tufa tapaa, lea la e mafua ai ona i ai le rebate lea po o le discount lea e faaaogaina e totogiina ai tagata nei. Ma o lau tuualalo la i lau Afioga i le Minisita, se i toe silasila ifo i le vaega lea, o le a le toe maua ai se tupe maua a ia tagata o si o tatou atunu. O le a mafai foi ona aveese ai e le vaega lenei o le Tulafono ia le tulaga o le faafaigaluegaina o tagata.

O le vaega lona lua lau Afioga i le Minisita, se i toe silasila lava i le laisene lea na tuuina atu i le fale tapaa. E pei lava o lea sa taua foi i le taimi sa faatalanoa ai lenei Tulafono, e tai tausaga ma tuuina atu le laisene. Ia ae o lo o aumai se faataitaiga pe a ma se ½ miliona le tau o le laisene e tasi. Ia pe le mafai ona silasila, tagai ane pe tai lua tausaga ma ave i ai le laisene, ia e pei o nai manatu ia i lenei taeao, manuia lau Afioga i le Fofoga Fetalai, faafetai.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

**FOFOGA FETALAI:** Malo...

**Tofa Hon LAUOFO FONOTOE NUAFESILI PIERRE LAUOFO  
(Anoamaa Sisifo):** Lau Afioga i le Fofoga Fetalai, se avanoa puupuu.

**FOFOGA FETALAI:** Se i tulai mai le sui usufono o Anoamaa Sisifo.

**Tofa Hon LAUOFO FONOTOE NUAFESILI PIERRE LAUOFO:**  
Faafetai mo le avanoa, ia tatuou i ai faatasi ma lau Afioga i le faafetai ua siitia i lenei taeao, i le tatou Tapau Sili i le lagi. Faamalo folau.

O nai manatu pupuu lau Afioga i le Minisita mo le Soifua Maloloina, ona o lea e maitau atu i le Tulafono o lea e aumai ia... o lea ua tuu i lalo o le uiga o le upu tapaa, ia mea ia o non nicotine delivery systems. E pei e foliga mai foi lele o mo mea o tau ia o tapaa, ae leai ia se nicotine, ae lea pei e maua, o le nicotine lea e mafua ai ona maua le tagata lea e taumafa tapaa i le gasegase e tele lava o le kanesa le gasegase e aafia ai. Ae lea la e maua foi i nai saililiga, o mea ia e taumafai foi lele e tagata taumafa tapaa e tuu ai le toe tagofia o le tapaa mo mea o non nicotine delivery systems po o le sao lea? O lea la ou te fesili atu ai i lau Afioga mo se faamalamalamaaga o lea tulaga, ina ne i taofia e le Tulafono ia mea ia, a o mea ia, e fesoasoani i tagata taumafa tapaa e taumafai ia tuu ia le tapaa, aua le toe tagofia le tapaa.

O le isi lau vaega lau Afioga, o laisene ia sa sauna le sui usufono o Falealili se tasi o sui usufono mai Falealili, i mo mea o laisene tai lua tausaga, ia a o le manatu e silasila foi i ai lau Afioga; Pe i ai se tapulaa o laisene e tuuina atu i tagata o lo o faataua tapaa, latou o lo o gaosia tapaa, ia o latou o lo o faatauina atu le tapaa, ma tulaga faapena. O le a se silasila a lau Afioga ma le Matagaluega, pe tatau ona i ai se tapulaa o laisene? Pe afai lava o lea e tulituliloa le tulaga foi lele ia ausia le manulauti o le Matagaluega, ia tuuitiitia ia tatou foi ia ua aafia i gasegase.

Ia la foi ua ttau le tulaga o le Komiti lea maitau atu e toasefululima sui o le Komiti, ia e pei foi lea o lea e maitau atu o lo o i ai le Matagaluega o Taaloga, ia ae o lea foi e toe i ai ma le SASNOC, o le Komiti lea po o le Asosi o lo o vaaia taaloga, ia se i silasila po o ua toatele tele ia le Komiti, ia aua e mafai lava ona fai le fono foi lele, a manaomia logo le Matagaluega po o se Faalapotopotoga e o atu i luma o le Komiti e faaali so latou finagalo e tusa ma se mataupu o lo o tagofia e le Komiti. Ia o tulaga na e pei ona ou tulai atu ai.

Ia ma le fesili mulimuli lau Afioga i le Minisita, ia ua ttau ona i ai ni faamaumauga o le tou Matagaluega, po o le a se tulaga ua oo i ai le fuainumera o latou e taumafa tapaa po o ua tuuitiitia i le faatulai mai o lenei Tulafono? Aua o lea ou te tilotilo atu i le Tulafono lenei, ua fai foi sina leva na i ai. Ia po o le tulaga la po o ua tuuitiitia latou e taumafa tapaa, i le agaga foi lele i le tuuitiitia ai foi latou foi latou e aafia i le gasegase e mafua mai i le taumafa tapaa. Ia e pei o nai motugaaafa na lau Afioga i le Fofoga Fetalai, ae faafetai tele mo le avanoa.

**Tulafono Tau Faaofi o Teuteuga o le Tulafono o Puipuiga Mai Aafiaga o le Tapaa 2018 – faitauga faalua**

**FOFOGA FETALAI:** Faafetai, tuu atu le avanoa i le sui usufono o le Itumalo Tu Taulaga Sisifo.

**Afioga FAUMUNA ASI PAULI WAYNE FONG (Itumalo Tu Taulaga Sisifo):** Faafetai i lau Afioga i le Fofoga Fetalai, afio foi lau Afioga i le Taitai o le Malo i lenei taeao aemaise foi le mamalu o le Kapaneta ma le latou vaega, ae puupuu lava se manatu lau Afioga i le Fofoga Fetalai. Ou te tulai atu o le aotelega o le Tulafono o lo o taumafai atu i ai, aemaise lava le tulaga lea o le factory compliance. O fale o lo o faatino ai ia le faiga, fausia, packing ia ma mea faapena lau Afioga i le Fofoga Fetalai. E tuu atu ai se tuualalo i lau Afioga i le Minisita, se i toe tagai lava i le tulaga lea. Masalo pe na o le tasi lava le kamupani lea e i nei lea e lelei ona faia le tulaga lea le factory ma le compliance ma mea faapena, ona o lo o fau ese lava le fale e fai ai le sikareti. A o isi fale sikareti fou lea e i ai nei lau Afioga, o le a ou le taua le atunu, o e mai fafo, ia e nonofo le aiga mai tua, ae fai le factory i luma, pe e nonofo foi le aiga i luga i le fale fogafalelua, ae fai le factory i lalo. Ae e tatau lava ona i ai lava se fale faapitoa, e ese mai i le mea o alala ai i latou o lo o faia nei pisinisi.

Lau Afioga i le mataupu lona lua, o le branding, o lea ua i ai nei ia le Tulafono lenei a le Ofisa o Tupe, e fai ai ia mea o brand o mea faatau mai i fafo, ina ia mafai ona maua ai le vaega e sili ona maualuga ina ia lelei. O le taimi lenei, ua ova atu ma le 20 brand o sikareti o lo o i ai nei i Samoa ae tasi lava le brand ou te iloa e au ia, e na o le brand lea a si vaega lea lea ua leva foi ona i inei lea e fai le Factory e tau o le Pall Mall lea e i ai le red ma le green. E tatau ona tilotilo lau Afioga i mea ia, ina ia mafai ai ona fai se brand, e mafai ai ona taga i inei i Samoa ia mo le lautele foi o le atunu, e le o se mea lelei le ulaula, ia ae tatau ona fai le tulaga lea, e mafai ai ona maua e tagata ia le brand sao, a ua uma ona pasia atu e le tou Matagaluega ia aua o lea lava e talia, ae pasia, pasia atu e outou ina ia mafai ona faatauina. Ia o nai manatu ia e lua lau Afioga i le Minisita, ia e tuu atu i ina, e fesoasoani atu ai i le Tulafono, ia manuia le Fono ma le faaaloalo lava, faafetai.

**FOFOGA FETALAI:** Malo, tulai mai le sui usufono, ia tulai mai le sui usufono mo Salega Sasae ona sosoo lea ma le sui usufono mo Anoamaa Sasae.

**Tofa OLO FITI AFOA VAAI (Salega Sasae):** Faafetai lava i lau Afioga i le Fofoga Fetalai, piiama foi lenei itumalo i le taulaga ua siitia i lenei taeao, ae e puupuu lava se fesili i le Afioga i le Minisita e tauala atu i le Nofoa. Ia ua malamalamama uma i le tulaga i le uumi o le lapopoa o le mamafa ae toe lava o le uumi lea e le i saunoa i ai lau Afioga po o le a le ituaiga uumi e uumi ai ia sikareti.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

E mafua ona ou taua le vaega lea, ona o lea ou te le i tilotilo atu i le Tulafono i le aafiaga foi o tapaa foi ia e fai e tatou i tua, mo mea o tipi ma mea faapena lea e gaosi mai i tapaa Samoa pe o lavea ai si vaega lena i lau Tulafono, o nai mea foi na o la e fesoasoani foi i nai aiga, ia ou te iloa foi e leai ni nicotine ae tatala mai le vaega lena ia e fesoasoani i nai o tatou aiga o lo o taumafaia lea atinae e fesoasoani ai foi i nai aiga. E pei e puupuu lava si au fesili lau Afioga i le Minisita.

**FOFOGA FETALAI:** Tulai mai le sui usufono o Anoamaa Sasae.

**Afioga ALAIASA MUAGUTUTIA MOEFAAUO MALAGAITUTOGIAI SEPULONA MOANANU (Anoamaa Sasae):** Faafetai mo le avanoa i lau Afioga i le Fofoga Fetalai, o lea foi ua momoli mai le soifua i lenei taeao fou i le paia o le Maota i le alofa ma le agalelei o le Atua. Ia ua talitonu foi, e le toe ta i Utuma se faamoemoe o le a fagatonu le malama e tusa ai ma le mataupu ua opea i le Laulau a Fono.

Ia o le Tulafono lava ua aumai, e lagolagoina i le aotelega a lenei itumalo, ae sa ou faapea o se Tulafono o le a taofi motu ai le tapaa, pe afai o le agaga lea e aumai o le tasi lenei mea o lo o faatupu gasegase i le paia o le atunu, ae pei e foliga mai, o lea lava e aumai e taofiofia ia ma faatupulaia ai le tau o ia mea aua o tatou tagata. Aua a fai nei laisene ma nei mau mea, ia o le a faapena foi ona faaopoopo isi tau a le aufaitapaa, ia e aafia ai lava ia o tatou tagata.

E i ai ia le mataupu lea e sau i i mea ia o tamaiti, ae leai la se mea o faia e le Tulafono i le tamaitiiti lea ua 13 tausaga ua ulaula, 14 tausaga ua taumafa i le tapaa. O lona uiga e tatau ona oo i ai ia le malosi o le Tulafono lenei aua afai e faasala ia le tagata lea e 21 tausaga i lalo o le 21 tausaga ma faatau ia le tapaa, e tatau la ona faasala foi ia le tagata lea e laitiiti ia tausaga, ia a ua tagofia ia le tapaa ia po o lenei foi oloa.

Ia lea ua uma ona malamama le faamoemoe i le tele o nei mataupu i le Aso Gafua. O le fautuaga foi i lenei Komiti ua faatu e tatau ona aumai ni sui e le taumafa tapaa, ona aumai lea o ni latou finagalo foi lea e faapena ona ogatusa ma le faamoemoe o le Tulafono, aua a aafia ai ma le autaumafa tapaa i totonu o lenei Komiti, e fiu lava e toso lava e latou i le mea e fifia ai latou, pe a faapea e fautuaina le Afioga i le Minisita. Ua leva ona tatou mafuta ma si Fale Gaosi Oloa o le Tapaa ua loa foi le tautua, ia pei ona taua e se tasi o sui usufono, e le o agai lava se vaai a se isi i le faaaogaina o tatou tapaa ia e toto i totonu o le atunu, e fausia ai ia nei oloa, aua o le tasi lenei vaega o lo o fai se faatauvaga ma oloa nei tapaa, o oloa ia o le tapaa Samoa ma le tipi, se i tulou le tauga o le sikareti lea, ia tasi lenei oloa o le one of the biggest competitor i totonu o le maketi lenei, ae leaga o lea e le o oo i ai le Tulafono, ou te le iloa po o le a se silaisla a le Matagaluega pe aafia ai le soifua i le tulaga o le faaaogaina o lea foi tapaa Samoa lea, ma le agaga faaaloalo. O le matou manatu vaivai lea e tusa ma le Tulafono Tau Faaofi.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

Ae avea foi lenei avanoa ua taia ai i le faalogo le paia o le atunu, o lea faatoa maua so matou avanoa i tulaga foi na tulai mai i lo matou itumalo e aafia ai nuu o Falefa ma Lufilufi. E tulai atu ma lou loto maualalo, afaia ua pisi le foe o lenei itumalo ma aafia ai le paia o le atunu, e avatu vaimalu i puega maasuas atu vaimalu. Mo le silafia e lo tatou Maota, ia ua taoto i lagotonu le faamoe. O le mea lea ia viia le Atua. O le agaga maualuga sa faaalia i le feiloaiga a le itumalo, o e e faatupu le filemu, ia ua taua i latou o fanau a le Atua. O lona uiga, ia o fanau uma lava a le Atua o la e i tua i le Anoamaa i le taimi nei, ona ua latou faatupuina le filemu. Ae faamalulu atu i le faafogoa a lau Afioga i le Taitai o le Malo ma le paia o le Maota, ia o se matou tala lea matou te faamaualalo atu ai i le Maota ona o tulaga na aliali mai, ae talosia i le alofa o le Atua e le toe tulai mai se mea faapea. O le moemoenoa ma le laufaleaina, e tatou te fiu lava, leaga o lo o malosi foi le alii o le lalolagi i lenei vaitau. Ia manuia le Tulafono pei ona tulai mai le Afioga i le Minisita, faafetai mo lou avanoa i lau Afioga i le Fofoga Fatalai.

**FOFOGA FETALAI:** Malo faafetai, ua faafogoa foi le Palestina. Se i tulai mai le Afioga i le Palestina. Malie le sui usufono mo Faleata Sisifo, se i tapa le Afioga i le Palestina.

**Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi (Palestina):** Lau Afioga i le Fofoga Fatalai o lea ua faafogoa le atunu i le kofesio o sui usufono lea e ana itumalo ia e faatupu faalavelave, fai ma lua o i lua itumalo. Ae e agai tonu lava lau mataupu i le ata foi lele o le Ten Commandments, se i fai ma tova ai le tatou Fono. E manatua foi le ata lea o le Ten Commandments lea e sefulu tulafono a Mose lea sa faafoe mai e tagata lauiloa nei o Charlton Heston ma Yul Brynner o Yul Brynner la sa faa-Farao. O Yul Brynner o lesi lea tagata lauiloa i le mea o le fai tifaga, e oti le tagata lauiloa lenei ua multi billionaire i le tele o seleni na ia maua. E i ai le taeao ua fai si leva sa ki ai lau TV a o i ai i Japani i le isi foi fonotaga, e i ai la le polokalame a le Malo o Amerika e faapea, Good morning America, e aumai ai la mea o tagata lauiloa e aumai ai ni nai a latou fesoasoani faafautua, o le a ou le toe taua lea upu o le tuualalo ae aumai ai a latou tuualuga e fautua mai ai i le lalolagi. E ki atu loa lau laau, ae tu mai ia Yul Brynner, ae tu mai loa e laei mai i ona laei sa na ia pueina ai foi le ata foi lele, The King and I e autu ia Thailand ma latou nofoaiga tupu o aso anamua. O lea la ua tu mai, sii loa ma lona lima taumatau ma faasinotonu mai lava ia te au, o au lea e tu, ua ou te*tegi* e vaai atu e faasinotonu mai lava ia te au ma faapea mai, o le latou polokalame, *hoe* lea ou te tautala atu ai*oia* ma faasino mai lona lima sau tonu lava ia te au, *hoe* lea e te matamata mai ia te au i lenei taeao, lea ou te tautala atu ia te oe i lou faavalevalea, pe afaia e te ula tapaa, ua outou vaai mai o au o le tagata poto, e tele au tupe, ae pau lava lea o le mea valea na ou faia, o lou ulaula, ua ou tago i lenei mea o le tapaa, lea la ua ou mai i le kanesa, ua toe nei o se aga, ona ou oti ona maumau lea o lea e le i taitai lou ola.ø

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

Ia pau lava lena o lana feau. Ia uma loa le Good morning America ae faasolosolo polokalame, ia e fai mai la i le po ia na ou alu loa ou moe, e ki atu lau TV i le taeao, ae sau le faasalalauga, ua maliu le tagata lauiloa i le lalolagi o Yul Brynner, ua oti maumau lona soifua ona o le tapaa. Ia a o si ata lena e pau lava lena o le mea na ou fia tau atua ia te outou. O upu a Yul Brynner o au o le tagata poto, ae ua aliali i i lou faavalevalea, ona ua ou tago fua i lenei mea o le tapaa ua ou oti ai. Ou te foi mai, e ki atu lau TV i inei, ae sau le ata o si tatou tama foi lea sa faasalalau news mai le 2AP o Pat Mamaia, ua ou te*ā* lava i lou vaai atu ua leaga faia le tino. Ae sau foi ma lana ia faatoesega e faapea mai, ua le o toe umi ona ou oti lea, ua ou lavea i le kanesa. Uma loa lena, ae sau loa ma le faasalalauga ua ou le toe vaai i ai ua ou fiu e fai i le falemai, se i toe sau lava le latou faasalalauga lena lea e sau loa, ae sau loa ma le faaupuga, e leaga le ulaula, sau loa ma le mea lea, tulou lava o mea o upu foi ia tuusao ina ia malamalama ai i latou o lo o faafogafoga mai i le taeao lenei, na ona pue mai lava ia faamaga loa se i tulou le tagata lea alu atu le asu, alu atu lava le asu ma alu atu lava ma ta uma atu ai ma le alaea alu atu lava i totonu alu lava i totonu le ata, ua uliuli patoi uma atu ai lava, ia ona sau loa lea o lena mea lea le nicotine lea sa lauga mai ai ia le Afioga i le sui usufono o Anomaa Sasae lea e mafua ai le mea lea o le kanesa. Ua ou fiu e toe saili, se faasau le mea lena, ia ae fai mai ua le iloa. O le manaia ia o lena faasalalauga.

Lau Afioga i le Fofoga Fatalai, o le matautia lena o le Tulafono lea e faafetai foi i le Afioga i le Minisita ma le aumaiga o le Tulafono lenei. E i ai lava le itu faigata o le Tulafono Tau Faaofi lenei, ona pei e tagofia ai le aiatatau a le tagata, lana aiatatau foi lele e pule lava ia i lana mea e fai. O le ala foi la lea, aua e lua lava ituaiga iuga e faia e le Malo, o le matua taomi o le aiatatau, taofi loa, aua ne i toe faaulufale mai se tapaa. Ma le lua, o le matua faafaigata o aiaiga o le Tulafono ina ia faigata ai ona toe ula tapaa ia tagata. O le isi la mea o aiaiga ia, a o le isi mea e masani ona fai e le Malo, o le matua tuu lava i luga i le lagi ia le tau o le sikareti ina ia oo lava po o le \$100 i lau tapaa e tasi, se tamai tapaa foi lea e na ona ula lava uma po o le tuu i le \$100. Ae tasi lava la le auala e faamalosia e le Malo, o le matua tuu lava i luga tiute. O mea ia e faatamaia ai le soifua, tuu i luga tiute o mea ia e faatupu ai mai, mea suamalie, mealololo. Aua e faigata tele ona taofiofi le tulaga saoloto o le mea lea o le pule lava le tagata ia. A o le mea lea e tupu nei, o le matua taugata, o vaiaso uma, vaiaso uma, vaiaso uma, o alu atu talosaga a fomai, ave i fafo latou ia ua mamai. O le mea la lena, e le mafai lava ona aveese le Malo mai le faiga o Tulafono, o Tulafono e matua tuu ai lava i luga tiute, o mealololo, moa, o mulipipi, tuu i luga, ae faataga pea. E ala ona ou fai atu mea ia, ona o tatou e tatou te manumanu i le soifua maloloina, ae sau loa se Tulafono foi lele ua tuu i luga, talofa i le atunu, o upu ia e alu atu i totonu o le Maota lenei. Afai tatou te manumanu i le soifua o tatou tagata, e tatau ona fai e tatou Tulafono e tau taofiofi ai le tagofia o mea ia, aemaise o mealololo. A o le Malo ia, toetoe lava ina matua fai loa faaiuga, tapu mea ia.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

E leai lava se mea e eseese ai le sikareti ma le mea lea o le uisiki, mea o...so o se....e oo i le vodka, taofi ma le pia, tofo la ae fai e le Kapeneta lena mea, oi, o le alalaga a le atunu, o se Malo ina a le mafaufau, a o mea na o lea e taumafai ina ia saoloto pea le tagata ia, saoloto pea i lona soifua, o le tagata e fiaola umi ma le tagata e fia oti vave, ona alu lava lea o ia e fai mea ia. Ae pau la le mea o le a agai loa i ai le Malo, o le matua fai o aiaiga ina ia taumafai, o le tagata lava ia e fiapoto pei o Yul Brynner, poto loa, ae le aoga le poto atu ua le aoga, ua toeitiiti lava tuu i le lua. O le tulaga la lena o lea e faavae ai Tulafono ia a le Malo, ia tuu pea le avanoa i tagata, o lea na tulai mai le isi sui usufono talanoa i mea o galuega, o le tele ia o fuafuaga a le Malo ua aafia ona o le mafaufau i mea ia o galuega, galuega ia sa laga mai e le isi sui a usufono. O le taua o manatu na, o lea e fai ma lilifa ai pea ia fuafuaga a le Malo, faia ia ni gaoioiga e faafaigata ai ona faatau e tagata, ma vave faapopoto ai, i le taumafaiga lea o lo o taumafai atu ai le Malo. O le mea lea o le tapaa lea e tupu ai le kanesa o le mama, o le tasi lena o kanesa o faamai oti ia o lea e aafia uma i totonu o le Non-Communicable Diseases lea sa lauga pea ai le Afioga i le Minisita, o faamai nei lea e feoti ai le 3¼ o tagata o le Pasefika atoa, 3¼, o le ala lena e taua ai o faamai nei o faamai oti, o lea la e aafia ai le kanesa.

Lau Afioga i le Fofoga Fetalai, o lea e taua le tipi, e aafia foi le tipi ma mea o fili tapaa. O lea sa maoae ai le afioaga lea o Leauvaa, e fiafia e fai le mea ae ou te le iloa po o ua fia ni tagata ua feoti ai, talu ai tapaa a Leauvaa. Ae sa uunaia lava mea ia ona e ola ai latou, ae tafefe i se toatele o tagata o la na feoti ai i nei mea.

Lau Afioga i le Fofoga Fetalai, pei o le agaga lena. O lea e taumafai lava le Malo ia faasaoina o tatou tagata i le faafaigata o aiaiga ae tuu pea le tagata ia e pule ia, a fia oti, faitalia ma lana faiuga, a fiaola umi, faitalia ia ma lana faaiuga. Silasila foi lau Afioga i le Fofoga Fetalai, a o le i faia e le Atua le tagata, o le mea lena e ma te talanoa soo ai ma lau Minisita Lagolago e fealuai ma le Tusi Paia i le 30 itula o le aso, a o le i faia le tagata ona finagalo lea o le Atua, tuu i ai ma le saolotoga, saolotoga e fai ana faaiuga, lea e sai ai isi tagata o le a foi le mea na toe tuu ai lena mea o le saolotoga, a na le tuu fua i ai lena mea o le saolotoga e le agasala ia Atamu ma Eva. Ae a na aveese lena mea, semeamanu faapenei o lea tatou te i ai lava i lalo nei, ae tatou te o uma lava i le lagi, e leai ma ni faitioga ma lalafi i tua o le OLP e pei o le mea lea e fai e le tama lea o Levaopolo, i le lalafi i tua o na mea ma faaleaga mai le Malo...

**Tofa Olo Fiti Afoa Vaai:** Lau Afioga i le Fofoga Fetalai...

**Susuga Hon Tuilaepa Auelua Fatialofa Lupesolai Lolofietele Neioti Aiono Galumalemana Dr. Sailele Malielegaoi:** Ua uma ai foi i i.

**Tofa Olo Fiti Afoa Vaai:** Lau Afioga i le Fofoga Fetalai...

**Tulafono Tau Faaofi o Teuteuga o le Tulafono o Puipuiga Mai Aafiaga o le Tapaa 2018 – faitauga faalua**

**Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi:** O outou uma lava ia, e lavea ai foi ma Levaopolo, tuu, tuu le amio lena, aua na ou fai atu, na faasalalau atu, e leai lava se isi o outou e le o iloa, lea ua iloa uma lava, outou ia e faavevesi le atunu, ae lea la ua uma ona fautuaina ia le... lea ua ou tau atua na o oe, lea la ua fautuaina le Ofisa o le Loia Sili ma le Komesina mo Leoleo, molia, molia i le Tulafono. O le a vevesi le atunu lenei ona o mea nei tou te faia.

Lau Afioga i le Fofoga Fetalai, o le a faaiu atu i i ia si au agiagi i mea tau tifaga. Fai ma tatou o tatou tifaga, pue mai aoaoga lelei.

**Tofa Olo Fiti Afoa Vaai:** Lau Afioga i le Fofoga Fetalai, pe maua lava sina avanoa i le tulaga lea ua saunoa ai le...

**FOFOGA FETALAI:** E le o taua lou suafa...

**Tofa Olo Fiti Afoa Vaai:** A lea na taua e faatolu lava ona tau mai...

**FOFOGA FETALAI:** O Levaopolo a o oe o Olo.

**Tofa Olo Fiti Afoa Vaai:** Ia leaga foi na avatu lava lau Levao ma le P ae tuu lau... lea la ua ou sau ma lau Olo ae...

**FOFOGA FETALAI:** O Levaopolo lea sa sui usufono talu ai a o Olo lea ua sui usufono nei. Ia saunoa le sui usufono.

**Tofa Olo Fiti Afoa Vaai:** Faamalulu atu o lea ua saunoa le Afioga i le Palemia i le tulaga i le OLP, ma ua tele foi taimi ua ou faalogologo ai i tuuaiga nei ia te au. Ae faafetai o lea ua ou faalogologo atu, tuu atu ia i le Faamasinoga se i matou o atu se i faasao le mataupu lea, ma e le logo lelei foi ia te au ma lo matou itumalo ia le tuuaiga lea. Ia a o lea ua saunoa manino lava le Afioga i le Palemia i totonu o le Maota, ia o le a ou faatali atu i le tatou mataupu. Leaga e le mama, e matuia le tuuaiga ma le agaga faaaloalo, faafetai.

**FOFOGA FETALAI:** Ia malo, faafetai, malo. Masalo toe pau lea o le sui usufono e fia saunoa i le mataupu lenei le sui usufono mo Faleata Sisifo ia o lea foi ua tele ina malamalama le mataupu i le saunoaga a le Minisita o le Soifua Maloloina.

**Tofa Lealailepule Rimoni Aiafi:** Faafetai lava, e fesoasoani atu foi i le fomai, Dr. Tuilaepa. O le mea lea e tupu ia Levaopolo, oi ia Olo, i le lakapi lea na tupu i le vaaiso lea na tea nei, na tuli le matai o le matou nuu e alu e faalogologo i tai i le fono a le Iuni la e fai po o le a le mea e fai i tamaiti la e faatupu misa.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

Ia, alu atu loa fai le fono a le Iuni, o le tagata e toe faatupu misa, o le a suspend. Ua foi mai loa le toeaina, fai le matou fono ou fai atu, ia se i fai sau tala po o le a le mea ua tupu? I le faasalaga e fai i tamaiti e faatupu misa, nofo nofo le toeaina ua galo ia te ia le upu faapalagi lea na tau i le fono. Ou fai atu, se fai sau tala o le a tuai, fai mai le toeaina o lea ua fai le iuga, o le tagata e toe faatupu misa, e sasa tele e le nuu, o le mea lena e tatau ona fai.

Lau Afioga, o le fesili i le Afioga i le Minisita, e fia ea ni a tatou fale sikareti lea e i ai? O lea na o le maua i ou taliga e i ai fale sikareti fou ia e i ai nei, aua e tasi lava le fale sikareti lea ta te iloa e ta ita. A lea faapea e i ai le fale sikareti lea e i i Tafaigata. Afai e moni, e matua leai se foliga o se fale sikareti i le fale gaosi mea i lea ituiga fale.

O lona uiga, ae le i avea se laisene, e tatau ona tagai lelei i ai po o faamalieina ia vaega uma o le Tulafono. Aua e le talafeagai pe afai o ituiga foliga ia pe afai o fai ai foi sikareti, e le talafeagai i lou talitonuga. O le masina lea na tea nei, na o matou lava ma le Minisita ma le Minisita mo Tina ma Tamaitai sa matou i ai i tai i le faalauiloa sa fai i tai i le Tanoa a le Matagaluega, na declare ai Samoa o le atunuu e le toe... smoke free i le isi fia ea tausaga. O lona uiga o le a le toe i ai lava se ulaula i totolu o Samoa, se tapaa. Ia ou te le o malamalama la pe e mafai ona fai lea mea, a lea e tuu mai i le Tulafono, o lea e foliga mai, o lea ua aiaia ia laisene.

Ou te fia fesili foi la, e 3 ituiga laisene ia e aumai, laisene e gaosia ai le tapaa, laisene e aumai ai i totolu le tapaa ma le laisene e faatau atu ai, distribute. O lau fesili lau Afioga, o le a le mafuaaga ua fai ai le laisene lea... o lona uiga o le a lavea ai ma faleoloa, wholesale, ma mea faapena ma faaopoopo ai ia pea afai o lena, ae le fai la... afai ua fai le laisene e aumai i totolu, ia fale tapaa, fale gaosi tapaa, e tatau ona tilotilo pe fia ni laisene e mafai ona ave? A o le a foi le tupe aua sa tatau ona aumai, pe fia? Aua o lea e faalogologo atu i nisi o sui usufono o lea e afa miliona i le tausaga. Ia o se tupe tele ae talafeagai, e talafeagai la e pei o fale sikareti e i ai nei, e matua tele ia le capital investment, tele le tupe e alu e set up lelei, ina ia manino, faamalie uma tulaga faale-tulafono mo le soifua maloloina ma vaega uma.

Tasi le vaega lea lau Afioga i le Minisita lea e faapea mai, e tuuina atu e le Pule Sili ia le laisene, ae afai e le faamalieina le tagata, afai e le avatua le laisene, e refuse le laisene, e mafai e le tagata lea ona tusi i le Minisita, ona toe i ai lea o le avanoa e tatala ai le laisene. Ia tailo i ai, a o lou talitonuga, e pei e le logo lelei lea mea, aua o le CEO lava o le Minisita foi lea, ae le tuu, afai e i ai se mea e le fiafia ai, ave la e i ai le Tulafono, ave i ai e faamanino, ae pei e le talafeagai i lou talitonuga, le tetee atu e le CEO, ae toe talia... e i ai le avanoa e talia ai e le Minisita. Ia tailo, ia aua i lou lea talitonuga, o le tala lea e tuu mai, e tele le sootaga o le alu i lalo o le ulaula tapaa, ma le siitia o le tau o le sikaleti, aua o lea e faapea mai, o Samoa o le isi atunuu ua pito sili ona taugofie ai le sikareti pe a faatusatusa i Niu Sila, Ausetalia ma atunuu ia.

**Tulafono Tau Faaofi o Teuteuga o le Tulafono o Puipuiga Mai Aafiaga o  
le Tapaa 2018 – faitauga faalua**

Afai la o lea ua i ai le faamaoniaga ia outou i faamaumauga e pau e alu i lalo le numera o le ulaula ona o le siitia o le tau o le tapaa, ia e tatau la ona tatou mulimilitai i ai pe afai o lea e matua taugofie tele i totonu o le tatou atunuu ia le tau o tapaa nei. O lea foi e faapea mai, e i ai tagata ia ua import mai ia le tapaa e toto i totonu o Samoa, ia se i saili lea vaega pe moi, aua e le talafeagai o lea lava e i ai tatou tapaa na masani ai, e faaaoga ma fai pe le mafai ona fai se fale tapaa ae faaaoga ai na o tatou tapaa ia, pe afai o le mea lea e agai i ai, aua e le mafai ona tatou tuua ia mea.

**Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai...

**FOFOGA FETALAI:** Ia, se i tulai mai ia le Palemia.

**Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi:** I le mataupu lea tau ina ou maua atu i le role a le Minisita. Ua ou manatua ai lava ia le tausaga na ou Minisita ai ae telefoni atu le Palemia ia te au, se i e tilotilo ane lava i le Afioga ia Tofilau, se i tilotilo ane lava i si tamaloa lea na sau ia te au e uiga i lana laisene, o lana faleoti. Ua teena le laisene e le Inland Revenue ona o ni tulaga, fai mai le falemai, ua lava le faleoti lea e tasi. Ia e le i umi lava ae tu le tagata e ana ia le talosaga le faleoti lea e i i Malifa ma lana talosaga, ia ona sau loa lea fai mai ia te au, ua teena lana talosaga ona ua fai mai ia le pule o laisene o le Inland Revenue e i ai lana faleoti, ua teena ona ua fai mai le falemai, ua lava lea laisene, ua lava lea faleoti, e le toatele ni tagata e feoti i Samoa ma ua ova foi ia le tasi lea.

Ia ona ou telefoni loa lea i le Pule o le Falemai, ae o la e saofai le tagata lea i ou luma. Ou telefoni atu ae fai mai le Pule o le Falemai, e leai lava ma se mea faapena o i ai, ae o le tele foi o faleoti e maua ai le tauvaga ia ma taugofie ai mo tatou uma. Ia ona fai loa lea o lau tusi, e ave loa i le Pule o le Inland Revenue e fai lana faleoti, se i toe silasila ane i lana faaiuga, pe talafeagai, o lea ua uma ona ou siakia, e leai se manatu faapena o i ai i le falemai lea ua mafua ai ona e teena. O le mea lea, toe silasila totoa i lau faaiuga, e ono tuuaia oe i le conflict of interest. Ia o le mea la lena na ala ai ona maua ia lena foi faleoti, mulimuli ane maua le faleoti e pito sili ona lelei, le faleoti o Sefo Pau. Ia o le tulaga la lena, e taua tele le tulaga o le i ai o le Minisita, e sulufai mai i ai tagata, pe afai e le faavaea lelei ia le faaiuga a le CEO.

Ia lau Afioga leaga o lea na oo i ai le saunoaga a le sui usufono o le mafuaaga lena, ne i tei ua faapea o faaiuga a Minisita e polokiki, e leai o i, o le Court of Appeal foi lele e apili mai i ai tagata pe a faaletonu faaiuga e fai i lalo. E tatau ona i ai se isi e i luga atu, e sulufai i ai tagata pe afai e o mai i lalo, e faaletonu atu le tali i lalo. E tele foi i taimi e omai ai i luga latou ma toe faamaonia atu e Minisita ia le iuga ua fai, ae la e sao ma amiotonu ia le faaiuga lea e fai e le Faauluuluga o le Matagaluega.

**22 MATI 2018**

**Tulafono Tau Faaofi o Teuteuga o le Tulafono o Puipuiga Mai Aafiaga o le Tapaa 2018 – faitauga faalua**

**FOFOGA FETALAI:** Malo, manaia le faamalamalamaga a le Afioga a le Palemia, ua manino ai auofala i lea vala, e pei ona laga mai e le sui usufono mamalu, masalo foi ua maea le saunoaga a le sui usufono mamalu. Ia faafetai, malo, faafetai i le sui usufono mamalu, ia o mataupu e lagalaga e faamanino e malamalamama ai, ia aemaise foi le faafogaga mai o Samoa, faafetai. Ia pe i ai se isi mea e fia oo i ai le saunoaga faamalamalamama a lau Afioga i le Minisita?

**Afioga Hon TUITAMA TALALELEI TUITAMA:** Lau Afioga i le Fofoga Fetalai, talitonu lea ua maea ona saunoa ia le Taitai o le Malo, o lea ua aafia uma ai lava ia vaega sa laga ma malamalamama ai le mamalu o le Maota. Ia aua o isi ia vaega ia ua toe auala mai ai ia fesili, ia o le vaega lea na taofia au ae le i oo atu i ai ia lau faamalamalamaga i luga o le tautinoga ua malamalamama uma ai. O lea la o le a ou le tali atu ai i le tulaga lea, aua o lea ua uma ona soaluapule i le tatou session foi sa fai, ia o le mea lea e faafetai lau Afioga i le Fofoga ma le mamalu o le Maota ia mo le avanoa mo lenei Tulafono.

**FOFOGA FETALAI:** Faafetai.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Puipuiga Mai Aafiaga o le Tapaa 2018 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono i le Komiti o le Va Fealoai mo le iloiloina ma toe lipoti mai i le Fonotaga e sosoo ai.

**TULAFONO TAU FAAOFI O TEUTEUGA O LE FAAVAE (NU.2)**  
**2018 – faitauga faalua**

**FOFOGA FETALAI:** Ou te tapa ma le faaaloalo le Afioga i le Taitai o le Malo.

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai faapea foi le mamalu o le Maota, ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.2) 2018 i lona faitauga faalua, ma ou te fia tautala faamalamalamama i ai.*

*Faaluaina e le Sui Palemia, Minisita mo Pisinisi ma Alamanuia, ma le Minisita mo le Soifua Maloloina.*

**FOFOGA FETALAI:** Ma le faaaloalo ou te tapa lau Afioga i le Palemia mo lau saunoaga faamalamalamama.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, o le Tulafono lenei Tau Faaofi o Teuteuga o le Faavae (Nu.2) 2018, e pei lava o le Tulafono o Tapaa, ou te tulai atu fua e faamalamalama, a ua uma ona malamalama i ai le Maota ona o lea sa tagofia i le aso sa faamalamalama ai lea mea. O le faiga fou lea ua i ai nei, na amata mai i le nofoaiga talu ai, ou te faamalo foi i lau Afioga i le Fofoga Fetalai ia faapea ia le Faaululuga o le tatou Maota nei, ua tele le taua o se faiga fou ua faia nei i le taimi sa ou faatoa tulai mai ai, e table, e faataoto le Tulafono i le taeao o le taimi foi lena faatoa matou faitau ai. Na ona faataoto lava amata loa ona lauga, e leai se avanoa e tasi lava e faitau ai pe faamalamalama.

Ia ona tulai lea o Tofilau lauga faalauaitele i le Tulafono, e uma ane ona lauga Tofilau, ua uma ona faitau e lea le Tulafono faatopetope ia tu i luga, ae o lea e alu le faasologa a matou i le faitauga o le Tulafono. Uma atu le toalua, ae ua uma ona faitau faatopetope e le vaega atoa ia le Tulafono ona faatoa tu tulai loa lea i luga. Ma ou te talitonu o le faiga fou lea ua taou faia, ua atili malamalama ai a outou Afioga i le Tulafono ona atoa le aso i luma mai o fai a tatou faatalanoaga nei ia ma i ai ia le Ofisa Loia ma omai foi ia faatumutumuga o Matagaluega o lo o taulamua i le Tulafono ma faamatala auiliili. O le ala foi la lea na taofi ai e le Maota le Minisita o le Soifua Maloloina, ona o lea ua maea uma lava ona faamalamalama le Tulafono Tau Faaofi. Ae o le taua o le toe tulai atu pea o matou nei i le taeao lenei lau Afioga i le Fofoga Fetalai, ona o lea faatoa faafogafoga mai le atunu, o le itu la lena e taua ai le faafogafoga mai a Samoa aemaise foi o le tapuaiga a Le Ao Mamalu O Le Malo, le Sui o le Fono a Sui Tofia ma le mamalu o le atunu o lo o tapuai i ona tulaga faalupelupe.

O le Tulafono Tau Faaofi lenei e Teuteu ai le Faavae o le Malo Tutoatasi o Samoa, ua aiaia se tulaga o le toe faaleleia atili o le Tulafono i le tulaga o galuega faale-Faamasinoga o Fanua ma Suafa. Ia faapena foi le saunia ai o le Matagaluega o Faamasinoga ma le Pulega Tau Famasinoga i le itu o le faatinoina o latou galuega fai. O le faamoemoe o le Tulafono Tau Faaofi, o le faaopoopoina lea o ni sui faaopoopo se toatolu i le Komisi o Galuega Tau Faamasinoga, o le Komisi lea e faia nisi o faaiguia tetele e taipei o le tofia o Alii Faamasino, e ala i le teuteuina la lea o le Mataupu 72 o le Faavae e faapena ona avanoa ai isi faatonuga i le Tulafono o faagasologa o galuega a le Komisi o Galuega tau Faamasinoga e faatinoina ia tulaga ia.

Lau Afioga i le Fofoga Fetalai e pei ona silafia, e mavaevae lava Itutino nei e tolu o le Malo, o le Palemene nei e faauluulu i lau Afioga, ia faapea foi ma le Faamasinoga e faauluulu i le Faamasino Sili, ia e faapena foi i matou o le Kabeneta ma le aufaigaluega uma a lo tatou Malo o lo o gafa ma tonufai ma le faatinoina o atinae a le atunu. E patino lava Itu nei e tolu o le Malo, ia ma e agai e le isi Itutino le isi Itutino.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

O le ala lena o lea e faalupe ai pea le Tafatolu lenei o le Malo, o le Tafatolu Fefaatauagai, e agai e le Faamasinoga ia Itutino ia e lua, e agai e le Palestene Itutino e lua o le Faamasinoga ma le Pule Faatonu o lo o ia te au ma Minisita o le Kapaneta ma le aufaigaluega uma a le tatou Malo, ia e agai foi e matou ia le Palestene faapea foi ma le Faamasinoga. Ae i ai la ni mea faaletonu, ia e faapena ona faatonu foi ma faufautua ia isi Itutino. O lea la e mafua ai ona faatu le lafo ma pasia e le Palestene lenei, o le a fai se Komiti latou te tilotilo i le faagaoioiina o galuega a le Faamasinoga ona ua tauau ina anoano ma tele ia faitioga faasaga i le faatinoga o Faamasinoga. O lena e silafia ua uma ona taoto le Lipoti ma o le isi la vaega taua ia na taunu i ai le Lipoti a le tatou Komiti, ina ia faatino e faalelei atili ia galuega a le tatou Komisi la lea o Galuega e faataoto ai galuega tau Faamasinoga a le Faamasinoga. O lona uiga, o lea e tali le Kapaneta i luga o fautuaga na aumai e le Komiti ma pasia e le Maota lenei. A o le Kapaneta foi la lenei, e le o se Kapaneta foi lele e na o le nonofo i luga o nofoa ma faaluelue ai. O le Kapaneta e na te silafia loa se mea taua ua avatu i totonu o le Palestene lenei, ona action loa lea. O lea la ua uma ona tauaao e a outou Afioga ia le Lipoti a lena foi Komiti taua a le Palestene lenei, o le faatinoga la lea o le latou fautuaga, o le Lipoti ma le Fautuaga ua uma ona pasia e le tatou Maota, ae talu ai ona e aafia ai le Faavae, ia o le ala lea o lea ua teuteu ai le tatou Faavae. Afaí foi e manatua e le Maota, o le isi lea fautuaga ma tuualalo a le Maota lenei i le isi foi mafutaga sa fai faa-Semina na tupu ae ai se finagalo o tatou sui usufono, e fautua mai le Malo ina ia teuteu le Faavae ina ia amanaia le aiatatau a alii ma faipule, communal right, po o aia toatele ia e aofia ai faalapotopotoga, ona o le mea lea e i ai nei Tulafono a Samoa, o lo o mulimulitui i Tulafono faapapalagi mai Peretania, e agai tasi lava na o le aloaia o aia a tagata taitoatasi, ae le amanaia le aia a tagata e pule toatele, e pei o ekalesia, pei o faalapotopotoga pei o alii ma faipule o tatou nuu. O lea foi la na lotea ai i ina i le tatou mafutaga le tulaga lea, o le le o i ai i totonu o le Faavae o le Malo o Samoa, le Faavae lea e i le Atua Samoa. O lea foi la na fai ai le tatou tonu ma o lea foi la ua uma ona teuteu le Faavae e tusa ai o tatou faatalanoaga sa fai.

Lau Afioga i le Fofoga Fetalai, o le uiga lena o le upu, e le o se Kapaneta nofonofo le Kapaneta lenei. A silafia loa e le Kapaneta se mea taua ua agai i ai le Maota lenei, fai loa, aua le toe tuu i se isi taimi. O le taimi lava ua aumai ia i tatou e le Atua, fai loa, e leai se isi taimi.

Lau Afioga i le Fofoga Fetalai, ia o le atoaga lena o le Teuteuga lena o le Teuteuga ua uma ona lagolagoina e le tatou Maota e tusa o le Lipoti a le tatou Komiti o le Palestene.

**FOFOGA FETALAI:** Malo faafetai. Ia se i tulai mai le sui usufono mo Aleipata Itupa i Lalo.

**Afioga TAFUA MALUELUE TAFUA (Aleipata Itupa i Lalo):** Lau Afioga i le Fofoga Fetalai, e momoli atu le agaga faafetai i lau Afioga i le faafoega o le tatou Fonotaga i lenei taeao.

**Tulafono Tau Faaofi o Teuteuga o le Faavae (Nu.2) 2018**  
**- faiatauga faalua**

E ave foi le agaga faafetai i le Afioga i le Palemia e tusa ma le lafo ua faatuina i le suiga o le tatou Faavae. E pei lava foi ona silafia, o nei mea o Faavae, e sui sui mai lava i lea taimi i lea taimi, ae ia ogatasi ma taualumaga ma gasologa o le soifuaga.

O lou tulai atu la ma le agaga faaaloalo, e lagolagoina lenei Tulafono po o lenei suiga. Lua, e momoli atu lou agaga faafetai ma le agaga faapitoa i lau Afioga i le Palemia ma le Kapaneta, ona o lea ou te manatua le 2016 ia Aperila ina ua uma le palota i le 2016 sa fai ai le tatou workshop lea sa ou laga ai foi le vaega lea, o le foliga mai e lilifa tele le Faamasinoga i le vaega foi lea o le tatou Faavae o le aiatatau a le tagata toatasi, verses i le community responsibility ia po o le aiatatau a le nuu foi lele po o le vaega toatele. E faavae lea faamatalaga ona e i ai nai faamasinoga sa ou faalogologo i ai ma ou lau i a latou iuga, o se faataitaiga, a faapea e ave i le tagata e toatasi le nuu atoa i le tetee o le nuu aua ne i faia se ekalesia i totonu o lea alaalafaga po o lea alaalafaga, e lilifa tele le faamasinoga agai i le individual right po o le aiatatau a le tagata e toatasi, ae faagalo le nuu atoa lea o i ai le latou iugafono po o le latou tulafono e tasi lava pe fia ekalesia i lo latou nuu, po o se faataitaiga lea lau Afioga, ma le faaaloalo, a o lenei la ua aluai aluai, ua pei ua talia foi nai talosaga sa tuu atu ma ua fiafia lava e faailoa atu, ese le manaia foi o lenei suiga o le a tatou i ai o le suiga o le Faavae, aua e le gata o lea foi pei o le a tatou sailiili ai i le Faamasinoga maua le isi vaega e toatolu e faaopoopo i le Faamasinoga. O lea ua 55 tausaga talu ona faatu lo tatou Malo Tutoatasi, ia a o lea na o le toatolu lava sa i ai i le Komisi o le Faamasinoga, o le Afioga i le Faamasino Sili, o le Loia Sili, ma le Sui o le Minisita o Faamasinoga, o le mea lava lena sa sau ai talu mai le 1962. A o le suiga fou la lea e i ai pei ona silafia uma e le Maota nei aua le faafofoga a le atunu, o le faaopoopoga lea o le a i ai ma le Resitala o le Faamasinoga o Fanua ma Suafa e le palota pe a fai ia le palota, o le a i ai ma le sui o le....o se Faamasino mai le Faamasinoga Sili ua malolo, ia ma le Peresetene o le Faamasinoga o Fanua ma Suafa. Ou te lagolagoina la le suiga o le tatou Faavae aua o lea o le a sui ai le tulaga lea.

E matua momoli atu lava lou agaga faafetai i lau Afioga i le ona le Tulafono e faapea foi le Loia Sili. E pau lava le agaga ua ou tulai atu ai, o le vaega lea i lalo o le (e) lena e i ai e faapea, o le Faamasino ua malolo manumalo mai le Faamasinoga Sili. Na o se tuualalo ae le fai ai, sa ou laga foi le vaega lea i le taimi o le tatou workshop, afai e le i ai se Faamasino mai le Faamasinoga Sili ua litaea ma faamalolo mai le taimi e uma ai le vaega lea o le a fai ai le Tulafono lenei, pe faamata pe a pe faaopoopo i ai nisi vaega po o a uma loa le vaega na o le Faamasino mai le Faamasinoga Sili po o so o se Faamasino ua i ai le agavaa ma le tomai faa-Loia. Lua, po o se sui sinia mai le vaega foi lea o Faalapotopotoga a le Sosaiete o Loia, pei o nai mea na e faaopoopo i ai.

Ae momoli atu le agaga faafetai i le Taitaifono ma le Komiti sa latou iloiloina lenei mataupu, matua manino ma malamalama, manaia le latou fuafuaga.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

Ae pei na o le pau lena o le mea na ou tulai atu ai ma le faaaloalo, manaia pe a tuu i ai le vaega lena, aua e pei o le agaga lena o le mafuaaga na taumafai i ai se suiga laitiiti po o le faaopoopo. O le tuualalo lea ma le faaaloalo.

**FOFOGA FATALAI:** Se i tulai atu lava le sui usufono mo Gagaifomauga Nu.3.

**Susuga Hon LAAULI LEUATEA POLATAIVAO FOSSIE SCHMIDT (Gagaifomauga Nu.3):** Faafetai i lau Afioga i le Fofoga Fatalai, e manatu foi e le moemoenoa, ae moe alaala ma moe manatunatu se lagona o lenei itumalo ona o lea ua tatou laasia foi lenei Tulafono Tau Faaofi taua i lenei aso, o le Faavae o lo tatou Malo, aemaise ai o lenei ua taunu le filifiliga a lo tatou Maota e Teuteu le Faavae, ia ona o le Ofisa o Fanua ma Suafa ma le Faamasinoga a Samoa.

E muamua ona momoli le faafetai i le Afioga i le Faamasinoga Sili, aemaise le Ofisa o Faamasinoga le Afioga i le Ofisa Sili o Pule, Afioga i le Resitala ma le Afioga i le Peresetene ma le mamalu o le Faamasinoga, ona o le galuega fita i fatia ua sola ma aso ua alu ma e na asa le gasu o le taeao i lenei Itutino malosi o lo tatou Malo.

Lau Afioga e le toe faamatala, o le Tafatolu Fefaatauagai, Vafealoaloai, Fetausiai ae le Feaiaai. E le au foi le pule ao i le pule po, e le sopo foi le tai i le eleele, a o le vanonofo ma vatapuia, o lea ua vaaia i le taeao lenei. E momoli la le faafetai ma le faamalo. Afai o le faatofalaiga lenei a le Ofisa o Faamasinoga, faafetai, faafetai i le tofa ae, faafetai i le Afioga i le Faamasinoga Sili ma le Ofisa o Faamasinoga, aemaise le Pulega i le mataala i le tuuina mai o fautuaga i le Kapaneta e toe liuliu le tofa i le Komisi Faapitoa lenei e faafoefoeina uma mataupu e faatonutonufolau finagalo ma ni manatu ma ni lagona i le Faamasinoga a Samoa.

Lau Afioga i le Fofoga Fatalai e le o lilo, silasila aso uma, taimi uma, le fai atu ma le fai mai o le atunu i faamasinoga, e le gata i faamasinoga i soligatulafono, a o le fatu a Samoa o le Faamasinoga o Fanua ma Suafa, aso uma, aso uma, taimi uma. Ona lagona lava lea o le lagona lagolago i le Tulafono Tau Faaofi lenei. Atonu o i o le a maua ai le mapusaga o iuleo lea e oo mai i le taimi lenei i le Maota. O iuleo foi o le tagisa ma le leoleoa ma le 1 mapu o le atunu, o le sailiga o mea nei o pule, pule o fanua, pule o suafa, faamasinoga i le va o aiga ma aiga, vafaafeagai ai o le nuu i le nuu. Ae afai o i o le a maua ai se faamamaavega lau Afioga i le Fofoga Fatalai, ia a mea o ula ia, ina ia mafai ona tatou agai e matimati ma ave le fesoasoani sili i lenei Itutino o le tatou Malo, e faaauau ai le galuega.

Faafetai i le tofa na ae i le fuataga lenei o le Tafatolu. Fai mai le mau a nisi o le aupopoto o le atunu, the most stable stool, is the stool with three legs. O le nofoa e pito sili ma sagatonu lona mausali, o le nofoa e tolu ona vae vaeane le Tafatolu o Faigamalo. O lona uiga, o le taua lena o galuega a le Maota Fono, o le matimati ma ave le fesoasoani e talafeagai mo le Tafatolu lenei.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

Leaga o le Tafatolu lenei e agai i ai le faafoaoaga ma fuafuaga alualu mamao a lo tatou Malo mo le lumanaí, a vaivai i fesili i, a faaletonu i matimati i, a lape i faasao i, o le agaga lena lau Afioga i le Fofoga Fetalai. O le faataua o le auauanaga a le Faamasinoga, o lena e fai atu, a e faaletonu mai i tai i le iuga o le faamasinoga i lou taimi o oe o le sao o le aiga, a e faaletonu e faaletonu uma lava isi tupulaga e lei fananau mai. O le eseesege lena o le mea lea. Leaga e taunuú loa i le apili mulimuli, e le toe i ai se togafiti. O le itu taua lena e tatau ona matua mataitu lelei, ina ia sao, sagatonu ma amiotonu faaiuga e filifili i ai le Matagaluega o le Ofisa o Faamasinoga. O le ala foi lea lau afioga i le Fofoga Fetalai, e leai lava se faiva e aunoa ma se maumau. Atonu foi e i ai taimi e luga lalo, misi le vaai lape le faautautaga, a o la lava e silasila le Atua i le tagata ma lana galuega. E le faigofie foi, e le faigofie leaga e aiga uma le atunuú. O le mea lena e tele ina tolopo, taofi ua le iloa po o ai o le a faia, e o uma i le upu lenei o le piitaga ma le sootaga o tagata. Ae faafetai ia i latou o e na faia le galuega i lenei fia tausaga, leaga o le latou tautoga tuuoti lea i luma o le Atua, ia faia le amiotonu. E faigata foi la i nisi o taimi ona fesiligia le amiotonu o faamasino, aua foi e toatasí lava le tagata na te iloa le amiotonu na o le Atua.

Ae ua ou manatu ma le agaga maualalo i lenei taeao e avatu ai le lagolago 200% a lenei itumalo, fai se Komisi lelei e fesoasoani i le Matagaluega o Faamasinoga i le latou foi pito laau. O le ala lea lau afioga i le Fofoga Fetalai, momoli atu moomooga alofa, faaauau pea galuega lelei o lo o fitaituga i ai nei itutino mavae ma le aoga o lo tatou Malo.

O le agaga lea ma le faaaloalo manuia le Fono.

**FOFOGA FETALAI:** Malo faafetai. O lea lava e maua le avanoa. Se i tulai mai le sui usufono mo Salega Sasae.

**Tofa OLO FITI AFOA VAAI:** Faafetai i lau Afioga i le Fofoga Fetalai, faafetai o lena ua sao lelei le tauga o le sui usufono mo Salega e le o le OLP. Lau Afioga i le Fofoga Fetalai, e 200% o le lagolago a le sui usufono mamalu, ae 250% ia ua. E mafua ona ou lagolagoina le Teuteuga lea o le faavae lau Afioga i le Fofoga Fetalai, ua ova ma le 50 tausaga o tauave lava e nai toeaiina e toatolu, tautala ma le faaaloalo i le Komiti mamalu. Ae o le mea sa sau ai, a filifili e le Komiti lea a tatou Faamasino ona lipoti lea i le Peresetene o Fanua ma Suafa. I lau tilotilo i ai e pei e le i talafeagai le vaega lea. Faafetai o lea ua aumai le Teuteuga o le Tulafono, o lea ua saofai ai ma le Peresetene o Fanua ma Suafa i totonu e avea ma Taitaifono. O le isi vaega lea, sa i ai lava lau research sa fai i nai tausaga ua tea. Sa ou taumafai ai e maua mai se faaiuga o a latou fonotaga ou te fia malamalamā i ai, i se mataupu sa ou fia maua. Ae o le upu sao lava lau Afioga i le Fofoga Fetalai, e fiu e sue se faamaumauga o a latou fonotaga. Ae o lea ua ou vaai atu o lea ua i ai le failautusi, o lea faatoa maua nei i i, aua o lea ua faamaumau o lea ua i ai le failautusi e faamaumauina ia vaega ia.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

Ou te tatalo atu i le Komiti fou, ma ua fou le Komiti, na ona toe silasila ifo lava i le tulafono ma faiga faavae a le tatou faamasinoga. Lea latou te pulea ai i le tofiaina o matai o aiga, i le tulaga lena. O le mea lea a o atu ae tofi mai, ua lava matai e lima a outou, o le isi vaega ua lava outou i matai e tolu. Lau Afioga i le Fofoga Fetalai, ou te tautala lava ma le agaga faaaloalo, atonu e le o se mea talafeagai, i le tofia mai e le Faamasinoga o Suafa ma measina a aiga.

E pei o lau tuualalo atu lena i le Afioga i le Palemia i le Tulafono. Faafetai.

**FOFOGA FETALAI:** Malo. Masalo o le a tali le Malo pe a foi mai i le malologa. E i ai se isi sui usufono e fia saunoa?

**Afioga Sulamanaia Fetaiai Tauiliili Tuivasa (Vaimauga Sasae):** Lau Afioga i le Fofoga Fetalai. E tulai lava i le ava ma le faaaloaloí

**FOFOGA FETALAI:** Faamalulu atu i le sui usufono, e toatolu outou lea e tutulai mai e fia saunoa i le mataupu lenei. O le a maua lo outou avanoa pe a taliu mai i le malologa. Ma lou faaaloalo.

*Na faataatiae felafolafoaiga a le Fono Aoao mo lana malologa masani i le itula e 10:43 i le taeao ma toe faaauau i le itula e 11:33 i le taeao.*

**FOFOGA FETALAI:** Ou te faasilasila atu ua toe amatalia Taualaumaga ma Galuega a le Fono Aoao Faitulafono.

E faia le tatou malologa, ua maea le saunoaga a le sui usufono mo Salega Sasae. O le avanoa lenei ou te tapa ma le faaaloalo lau Afioga i le sui usufono mo Vaimauga Sasae.

Tulai mai le sui usufono mamalu.

**Afioga SULAMANAIA FETAIAI TAUILIILI TUVASA:** Masalo o lea ua maea ona paleauau foi le taliga o le sua i lenei taeao i lena itu o le Maota i le afio a lau Afioga i le Palemia, o le Taitai o le Malo, Afioga foi i le Sui Palemia, le Kapaneta ma Minsita Lagolago, faapea foi i lenei itu o le Malu, i le afifio atu o sui usufono a le Palemene o Samoa, aemaise foi le afio o lau Afioga i le Fofoga Fetalai, Sui Fofoga Fetalai, aemaise le paia o Faafuuluga o Matagaluega a le Malo ma Faalapotopotoga Tumaoti, le atunuu o lo o tapuaia la tatou Fonotaga i lenei Maota.

Ae le i faia se sao o lenei itumalo o Vaimauga Sasae, ou te faatalofa atu foi i le tapuaiga a si ou itumalo o Vaimauga i Sasae o lo o tapuaia le faiva o lo outou sui usufono, ia tapuai maia ma le manuia.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

Lau Afioga i le Fofoga Fetalai, e ui lava i Tulafono uma ua tuuina mai i lenei Maota, e le fia faaalia i ai se finagalo o lenei Nofoa, e pei ona i ai mataupu ia na talanoa nei i le taeao e pei o le tapaa ma mea faapena. Ae oo loa i ooga o le Tulafono e pei ona aafia ai le faavae o le atunu. E pau lava lea o le mataupu e fia pese ai le sui usufono mo Vaimauga Sasae. E matau lava ma le totoa i lenei taeao ia saunoaga foi a nisi sui usufono i lenei foi itu, e tai 200% le lagolago tai 250% le lagolago. A o le sui usufono mo Vaimauga Sasae, e le oo i se 40 le lagolago a lenei sui usufono. Ona o le a? ona o le tele o mea e fia talanoa i ai lenei Tulafono Tau Faaofi.

O le mea muamua lau Afioga, e faafetai lava i le tama o le atunu e ona le tulafono aemaise o lana Minisita Lagolago. Aemaise foi o lena itu o le Maota i le Sui Palemia ma le Kapaneta, ona o lo outou mataala ma lo outou naunau aua se lumanai o Samoa ma ona tagata. Tou te le fefefe lava e fai suiga, ona o le a? O se manuia o Samoa ma ona tagata. O le taimi a o le i ulufale mai lenei sui usufono i le Palestine, na ou faalogo a o lote le Faavae. Ou te faalogo e pei se taugapelu e faalogo atu i ai i lenei Maota i le faalogologo mai o le atunu. Ae a lenei vaitau?, o lo o malu pea lenei Maota i le taitaiga a lau Afioga i le Fofoga Fetalai. Faamanuia le Atua ia te oe, faafetai foi i le sui usufono o lenei itumalo ua maua mai ni tama matutua i totolu o lenei Palestine, e faauliulifolau ai lo matou sa mo le agai i luma. A o le Tulafono a lau Afioga, e pau lava sina fesoasoani ma se tuualalo i lau Afioga i le Minisita po o lau Afioga foi i le Palestine ma lau Tulafono. O le tulaga lea o le toe tuuina i totolu o Faamasino ua litaea, lea e i ai le vaega lena. Ou te lagolagoina le toe faaopoopo i ai o nisi sui, ona o le a? E tele faitioga a le atunu i le vaega o Faamasinoga. O i foi lea, e le ma foi e tautala atu, e o lava isi i le tuugamau e o ma le faanoanoa i faaiuga a le Faamasinoga. Ae ou te faafetai i lenei Paeaiga ua tatou tagofia lenei vaega aua se manuia o Samoa ma ona tagata.

O lo o gugulu le atunu i le tofiaina o isi Faamasino se i tulou lava, fai mai e le iloa faalupega o itumalo ma nuu. A o lenei lava Tulafono ua tuuina mai i le toe faaopoopo o nisi sui, e lagolago e le sui usufono. A o le faaopoopo, e teena e le sui usufono mo Vaimauga Sasae le sui ua litaea, lea e toe tuu i ai e totolu. E lagolago le tuuina o le Peresetene o le Faamasinoga, lelei, a o le sui lea o le Faamasino ua litaea. O le a toe tuu i totolu ua litaea. O lea e i ai piriota ma tausaga, a oo loa i le tausaga pe 68 ea, ua litaea. A litaea la, ua leai ma se mea e toe mafai, na o le alu lava e fealuai i lana taavale ma vaai lana faatoaga. A o lea o le a toe tuu i totolu, o le popolega lena o le sui usufono mo Vaimauga Sasae. O lea e i ai le tulaga i le Aufaigaluega Paia a le Atua, aua a tuu foi i totolu le Faamasino litaea. A o le Faamasino Sili foi o le Faamasino, o lea la ou te talosaga atu ai i le Palestine ma lana Tulafono, faaaoga foi nai sui faifeau, le vasega o le Aufaigaluega Paia po o le fono a Ekalesia Aoao, aumai se sui o faifeau i totolu ae aveese ai le Faamasino lea ua litaea. O le teuteuga lena lau Afioga.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

O le Ofisa Sili foi o Faamsinoga lea ua tuuina i totolu, e popole foi le sui usufono mo Vaimauga, ona o le tulaga maualuga foi o le Ofisa Sili ua faaao i ai. A o lea e alu atu i totolu ae sau le faaupuga, e le palota ua na o se alu na o se failautusi. E faapefea ona tatou tuumamaina o le Ofisa Sili po o le e faauluulu i ai lo tatou Malo. Ou te tuuina atu foi ma se talosaga lau Afioga i le Palemia, se manaia ae aumai ai i ina ni sui o tina ma tamaitai, faaaoga i ai nai fafine nofotane ia fai mai e ita i lenei sui usufono, a o lou flavor lena o nai tina ia. Aumai ai se sui o tina ma tamaitai e faafailautusi. E pau lava lena o le teuteuga o le Tulafono, e tatalo atu ai i lau Afioga e ona le Tulafono, ina ia fai ni suiga. Aveese le Faamsino Sili ua litaea, ae aumai nai faifeau, aveese le Ofisa Sili o Faamsinoga pe a le aoga lana palota, ae aumai ai se sui o tamaitai. Manuia le faafogaga a le atunu aemaise lau Afioga i le Fofoga Fatalai ma lena itu o le Maota.

**FOFOGA FETALAI:** Tulai mai le sui usufono mo Alataua Sisifo. Masalo e toe pau lea o le sui usufono e fia saunoa.

**Afioga ALIIMALEMANU ALOFA TUUAU (Alataua Sisifo):** Faafetai mo le avanoa. E faatalofa atu i lau Afioga i le Fofoga Fatalai, faapea foi sui mamalu o lenei Palemene. Ae le gata i lea o auauanga eseese o tatou faatasi i lenei itula.

Ona o au le isi sa i le Komiti lea sa i ai le Lipoti lea ua talanoaina, sa leai se manatu e tulai, aua o la matou fautuaga lea. Ae e faale logomalie le faapea o le i ai faapitoa o se sui o tina i totolu. Aua i lou lava talitonuga i le tusiga o mea nei o Tulafono, e tusi i le gagana singular, tusa o na e aafia faatasi tama ma tina. E i ai lou talitonuga o le Peresetene o le Faamsinoga e mafai foi ona tina. O le Faamsino litaea o le Resitala o le Faamsinoga Sili e mafai foi o se tamaitai. E le auai la lou taofi i lea tulaga, aua e mafai ona matou oo uma lava matou tina i tulaga ia e lima e tusia mai i le Tulafono. A o le agaga o le lagolagoina atili o leí

**Afioga Sulamanaia Fetaiai Tauiliili Tuivasa:** Lau Afioga i le Fofoga Fatalai na o se mea lava e faasao. Vaeane le saunoa o le augafaapae o lenei Maota.

**FOFOGA FETALAI:** Malie le sui usufono. Faapuupuu mai le saunoaga.

**Afioga Sulamanaia Fetaiai Tauiliili Tuivasa:** E lagona lava le faanoanoa, o lea ua saunoa foi, ae sa le tatau ona saunoa o ia lea sa i totolu o le Komiti lea. A o lea foi ua saunoa ma aumai lona finagalo. I le manatu lava o Vaimauga Sasae ia, e pei ona ou fai atu, aumai pea le tali i le la itu, a o lenei lava e fai ma tali mai si ou tuafafine, se ou te faamalulu atu. A o ia foi o le tina a o lea e tetee i le tofiaina o tina, lea e promote atu e le sui usufono mo Vaimauga Sasae a o ia o le tina.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

**Afioga ALIIMALEMANU ALOFA TUUAU:** Lau Afioga i le Fofoga Fetala'i e leai se agaga e fai se feteneaiga e faia i lea tulaga. E pau le mea lea e fia faamalamalama i le sui usufono, a tusi mea nei o Tulafono, e tusi i le gagana e tasi lava i tama ma tina. E pei la o lau tala lea e tau fai atu, o le Resitala o le faamasinoga, o le Loia Sili o le Faamasino Sili o le Peresetene e mafai foi ona tina. E pau lena o le mea sa fia faamalamalama atili. A o le tulaga i le Tulafono, o le tulaga lea o le lagolagoina. I le tulaga ua laga ai le tofiga lea o le Faamasino litaea o le Faamasinoga Sili. Na tele ni lagona ma manatu na faaalia i ai, ae peitai o le lagona foi lea e tatau ona umia e e ua masani i le vaaiga faale-atunu, e sa masani ona tovaa atu i ai le atunu i le tulaga o le faatinoina o ia galuega. E pei o le agaga lena o lea na i ai se taofi i la matou Komiti, ina ia tuuina pea i ai ia le Faamasino ua litaea ina ia toalua ma le o lo o umia le nofoa, ona o laua uma ia ua masani i le vaaiga lea faale-atunu. Ma le Resitala o le Faamasinoga, e tatau lava ona i ai se isi e tapenapenaina ma fai ma failautusi, o lea e le tatau ona equal number, ona tutusa ia fuainumera ia e ono. Afai la e fai a latou palota ua faigata ona fai se faaiuga.

O le fesoasoani atu lea faatasi ma le lagolago a lenei itumalo. Faafetai mo le avanoa.

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetala'i .

**FOFOGA FETALAI:** Malo faafetai. Masalo ua maea ai i i sui usufono e fia saunoa. Ma ou te fautua atu i sui usufono mamalu, o lenei mataupu e avea ma maafuagalu le Lipoti a le tatou Komiti a le Palemene. Na ona faamanatu atu le itu lea, ia ona avanoa loa lea o sui usufono mamalu e ave i ai o latou finagalo, ina ia faapena ona maua avanoa. O lea la pei ona faafogofa foi i le tulai mai o le sui usufono o Alataua Sisifo, ia o se tasi o sui o le Komiti o le Komisi o le Palemene. E maitau atu i le tulaga o finagalo pei e eseese lagona ua toe faaalia mai, e le afaina, ae na ona faamanatu atu ina ia aua ne i toe....e le faigofie i le faafogofa mai a le atunu lea tulaga, le toe fetagaai o finagalo o sui usufono mamalu o le Palemene, ui o lea, afai lava o naunau le sui usufono e fia....e ese se isi mea mai mataupu sa laga, ia o le a tuu atu le avanoa, afai e leai o lea e tagatasi lava saunoaga, e sili ona faasee e tali le Malo.

E i ai se isi mea e ese ai Falealili?

**Afioga Fuimaono Teo Samuelu Teo:** Lau Afioga i le Fofoga Fetala'i e faamalulu atu ona o le tulaga lea e le i ai lou sui usufono i le tulaga lea sa aafia i le talanoaina o le Tulafono lenei, e silafia o lea sa i ai le faafitauli tele i Luatuanuu sa poloka ai le auala ma toe ui mai ai i le isi pito e taunu mai ua maea le Tulafono lea. O le ala lea o le tau fia saili atu o se avanoa, e tasi lava le fautuaga lau Afioga i le Fofoga Fetala'i, ae lagolagoina le Tulafono Tau Faaofi e pei ona tuuina mai.

**Tulafono Tau Faaofi o Teuteuga o le Faavae (Nu.2) 2018**  
**– faiatauga faalua**

**FOFOGA FETALAI:** Ia e lelei pe a tagatasi, ae na ona faamanatu atu, e manatua foi ua uma ona pasia e le Maota le Lipoti a le Komisi Suesue a le Palemene lea sa fai fuafua i ai pei ona ou fai atu o lea e maa faafuagalu mai lagona ia ma fautuaga, ae faamanatu atu ou te musu e fautua atu a o faafofoga tapuai Samoa, ina ia manino i sui usufono e maitau le tulaga o tatou galuega, faamolemole. Tulai mai le sui usufono.

**Afioga FUIMAONO TEO SAMUELU TEO:** Lau Afioga i le Fofoga Fetalai ma le faaaloalo lava e fia faaaogaina lou avanoa i le Tulafono Tumau e faaalia ai lagona. Ae talitonu lava o lea ua malu le fau i le tapuaiga ma saunoaga foi a nisi ua tuanai. E lagolagoina e Falealili Sasae le tofiaina o le Komisi lenei, na pau lava le agaga tuualalo, ua le na ma le laina ia nisi o faitioga aemaise o tulaga ae pei ona tuuina mai e ala i le faatuina o le Komisi pei ona suesueina mataupu tau le faa-Faamasinoga. A o le tuualalo a Falealili Sasae i le Komiti lava lea e faaopoopo i ana galuega faatino, pe a tusa ai ma le finagalo o le Minisita ma le Tulafono, ia aua ne i tuua se i oo i le 68 le tausaga e litaea ai po o le 70, ae ia i ai se piriota ina ia sailiilia ai pe fai valuations o performance a Faamasino, aua a i ai le Faamasino pe i ai foi le Sui Peresetene e faatautaia Famasinoga e lotea measina a aiga, e le faamaoni, aua le tuuloa se i oo i le taimi e litaea ai, a o le taimi lava e mataituna ai e le Komisi lea, ua tatau loa ona faia i ai le fuafuaga ma ave i ai lona iuga. Ma le faaaloalo lava, e pau lava o si mea na tau fia momoli atu le agaga faafetai. Ia manua lau Afioga i le Fofoga Fetalai.

**FOFOGA FETALAI:** Faafetai. Masalo ua maea ai i sui usufono e fia saunoa, ae tuu atu ia le avanoa i nisi o mea sa laga pe i ai se finagalo o le Malo e fai i ai sana saunoaga e faamalamalamala.

Tulai mai lau Afioga i le Palemia.

**Susuga Hon TUILAEPAPU AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ou te faafetai atu i sui usufono sa sausaunoa i le Tulafono Tau Faaofi lenei, ma ua toatele foi sui usufono na sausaunoa umi foi a outou saunoaga, ma e tatau ona o le Faavae lea ua lotea. Ua uma foi ona ou talanoa atu i le tulaga o lenei Teuteuga ia e afua atu lava i le Maota lenei, ma e o le tulaga lea, e taua tele. O lea foi sa aumai i le saunoaga mulimuli, a oo lava i le tulaga e matau ai e le Maota ua le faia galuega a le Faamasinoga, o i inei e maua atu ai ma le iuga. O lona uiga, e mafai ona faamalolo e le Maota lenei i le lafo e faatu ia ma lagolagoina ma palota i ai le silia i le . O lona uiga la, e taua tele i le Faamasinoga ona faafogafoga lelei i le tulaga o le liliuga o le tofa i Taitai o le atunuua aua e leai foi nisi o toe i s 1 , o lea ua i totonu o le Maota lenei Taitai o Samoa. E ao ai ona faautagia ia le mea ua fulisia i ai finagalo o le Palemene lenei.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

O le ala foi lea afai e teuteu se tulaga ogaoga i totonu o le Faamasinoga ona o le amanaia o le itu lea o le feavatai ma le faafeagai ai o le itu tutoatasi o le Faamasinoga, le Palestine ma le Executive le Pule Faatonu e ogaoga le tulaga a oo i ai le Palestine lenei, ona mafai loa lea ona aveese e le Palestine lenei. O le ala lena e taua tele ai ia saunoaga ia ua aumai e faaali ai atugaluga i le Faamasinoga ma le faatinoina o latou galuega. O le tulaga foi lea atonu ua laaloa i le Faamasinoga i le taimi sa faatino ai le galuega a le Komiti, ua matua laaloa ai le itu lea ina ua valaaquina e le Komiti ia le Faamasinoga ae fai le latou tonu e le omai. A na faapea la e tulituliloa e aveese le tulaga feavatai na i ai i le Komiti, ae tulituliloa le latou samania ae le usitaia, o i inei i le Maota e fai ai ma lona faaiuga. O le tulaga lena e matua matautia le paoa lea e i totonu o le Palestine. Ia ae o lo o i ai foi i le Palestine le tulaga ina ia matua faaeteete i le faaaogaina o le paoa lena, ia matua faaeteete, e faatoa liliu lava i ai, i le taimi e matua atagia ai lava se tulaga faaletonu ua oo i ai le Faamasinoga. O le mea la lea, e faapena le faaeteetega, e tatou te faia faaiuga ina ia aua ne i atagia ua tatou faaaoga sese ia le pule. O lea la ua tea atu si vaega lea, se i fai lava sina au tala ona o lea sa aafia i saunoaga i mea nei o nofoa. A manatua i se taimi pei lava o le tausaga lea na ou nofo ai i le nofoa lea e fa vae, ou te faalagolago atu i tua ae masii i luga vae e lua ia e i luma o le laki lava, e moni lava na tau lou ulu i tua, ae le i tau tonu i le mea e maai ai ia le nofoa lea e tuu mai tua po o le kesi lea e tuu mai tua. E le na o au na pau i le mea lea. E tau mai ai i ina, e oo foi i le nofoa e fa vae, e masipasipa-gofie, o le fautuaga, se i tilotilo ane lava pe tatau ona ono vae pe valu vae o tatou nofoa i le Palestine i teøi ua maumau se ola o se isi, a o le nofoa e aupito sili ona faaletonu, o le tolu vae, ae leaga o au e i ai ia sauaga, o le nofoa aupito sili lena, ona aua ne i vaaia i totonu o le Maota lenei e maumau ai le ola o sui usufono. O lea la ua tea le tulaga i nofoa ma o latou vae.

A o le a ou liliu atu i tulaga o le tofi o mea nei o Faamasino o lea e laiti pe talavou, aua le aumai ai ni Faamasino ua toeaiina ua litaea ua le toe aoga, pei o le manatu lea. Ae ia outou manatua foi, e i ai le upu e ave i e matutua, o le tele o tausaga o le tagata o le soifuaga lea ua tatou i ai, o le tele foi lena o le iloa, o le tele o le soifua o tausaga o le tagata, o le tele foi lena o lona iloa. E ui lava la ina faapea, ua muta i lalo o tatou tulafono ae le mafai ona aveesea le tele o le poto masani lea e i ai. O le ala lena o le faataua ua faalitaea ae la e tele lava le poto masani la e i ai. O lea ua litaea le isi Faamasino a tatou ona o tatou tulafono o la ua Faamasino nei o Faamasinoga o Talosaga a le Malo o Niue, ma e tau mai ai i ina le amanaia e lea foi Malo, o lea foi Faamasino. O lona uiga, e tele lava le aoga. A o le mea e aupito sili ona liolio i ai o faaiuga fai a le tatou Faamasinoga o Fanua ma Suafa. E i ai taimi e oo ai ia mataupu nei i le Faamasinoga Maualuga, pe afai ua alu alu alu le Faamasinoga foi a Fanua ma Suafa, ona tulai mai ai lea o se mataupu ua le maua se tonu i i, ae tatau loa ona ave i le Faamasinoga Maualuga, o i la e saofafai ai la ia tama la ia.

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

O se mea foi lea tuuaia ua feteenai ai ia talitonuga feteenai le faamaoni, ona afai e saofai ai i se Faamasino la foi e faamasino i o, ae o lea o le a toe avatu i o i le Faamasinoga Maualuga, lau Afioga o le mafuaaga lena, e le i soona teā la ua aumai le fautuaga lea a le Kapaneta e liolio i le mea lena o le Conflict of Interest, lea foi e mafua ai ona faamavae ese se Faamasinoga o Fanua ma Suafa pe afai o la e aafia i se Faamasinoga. A saofai ai la le Faamasino i i i totonu o tofiga ua matua aafia ia le Faamasinoga Maualuga. O le ala la lena, e tatau ona taataa mama o le faatinoina o tatou faaiuga.

Lona lua, e toalua a tatou Faamasino lea ua i ai nei ua litaea, ae a tuu i ai ma isi Faamasino ua litaea Samoa la e i Niu Sila, ua toatele e mafai ona tatou faaaogaina. Ae le iloa pe oo i le tausaga lea ua tolu, tausaga atu ua fa, lima, ono, fitu, valu, a o le mea matautia i le toalua lea e i ai nei, o lea e saofai ai ma le Faamasino sa faamasino i le Faamasinoga Maualuga a le Lalolagi i Mataupu Tau Solitulafono. O le Faamasinoga lena e le i leva ona faatu ae filifilia ai ia le Samoa, e leai ma se Niu Sila na filifili i ai, leai ma se Ausetalia na filifili i ai, e oo i le vaega lenei o le Pasefika, e leai ma se isi na filifili i ai, ae filifili i ai le Samoa lea e toatasi. O lea foi la ua litaea ma ia, tasi lena Faamasino e fesoasoani i le mataupu lea. O lea lau Afioga i le Fofoga Fetalai, o lona uiga, e matua loloto le Faaiuga a le Kapaneta e le i soona faia.

O le mea lea ou te faamalo ai i le Afioga i le Minisita o Faamasinoga ma Pulega Tau Faamasinoga, o ia lena na amatamea mai i le Tulafono lenei, ia ona aumai loa lea i totonu o le Kapaneta e faamaonia e le Kapaneta, ona aumai ai lea i lalo i i lalo o au o lou igoa, e leaga a oo loa i mea tau Faavae, ia ona sau loa lea i lalo o le Taitai o le Malo o le Atunu, ona e le mama le mataupu lea. O le ala lena, ou te faafetai ai ia le Minisita o Tulafono i le lototeli i le aumai o le Tulafono lenei ma lana aufaigaluega, e faafetaia foi le Kapaneta i le mamao o le faatofalaiga. O lea la e mafua ai le Tulafono. Ae i ai la se faafetai e ave, ave i le Minisita, ave i le Minisita e ana le Tulafono ma momoli i le Kapaneta ia mamao le latou tofa sailimalo, aemaise le Palemene lenei, le Komiti sa latou iloiloa ia le lafo ia ma le fautuaga, lea ua taoto nei i lumamea.

Lau Afioga i le Fofoga Fetalai, o le itu lea i le tuu i ai o se faifeau, ia ua tatou iloa lelei lava o le tofi lava o le faifeau ia mai le Atua, o lana Tusi Paia, na o le Tusi Paia lava na tofi i ai le faifeau, aua le aumai fua le faifeau e faaeleelea i i mea a tatou o lo o fai nei i le lalolagi, o mea faalelalolagi ia tatou te talanoa ai, o le Tusi Paia ma le talaiina o le Talalelei o lana ia lena matafaioi, aua tatou te....E i ai le upu e fai i faifeau, -aua e te toe tepa i tua i le suotosina, ø a na faapea la e loloto le mataupu silisili a le sui usufono o Letogo, e le oo i ia mea, o le mea lena e fai ai ma e talatalanoa i lau Sui Minisita e fealuai lava ma le Tusi Paia i taeao uma taeao uma taeao uma, semamanu e loloto ai foi lau faatofalaiga i le mataupu lea o le suotosina, a oo loa i mea ia, aua ne i toe vaai agai i tua....

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai...

**Tulafono Tau Faaofi o Teuteuga o le Faavae (Nu.2) 2018**  
**– faitauga faalua**

**FOFOGA FETALAI:** Onosai mai le sui usufono, saunoa lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le fautuaga lena, ae oo loa i mea faapea, talanoa loa i lau Sui Minisita. Ia, o le tulaga la lena, o le sui foi o tina, lea ua sao le faatofalaiga, sa tulai atu ai le sui usufono o lena Itu.

E i ai taimi e tusi ai Tulafono, ona faaaoga lea o faaupuga, po o le He, ae o lena e taui ai i totonu, a faaaoga le upu lena, e faasino uma po o le a lava le gender e tusi ai, e faaaoga lava e faasino i le tamaitai, e faasino i le alii. Ae o le tatou atunuu, o le ua aia tutusa uma lava tina ma alii. O lona uiga, e leai lava se mea e tau tau ai fua, ae o le ala lena ua ou alofa atu lava i le sui usufono, ona o le tulai ae ae o lea e aumai se tasi o fautuaga, e ese le mamao mai le tina na saunoa nei o le sui usufono o le Palestene nei, e aumai ai le faasaoga o le sao lava o lona ia sui usufono, e le o faapea e faatautee atu i le finagalo o le sui usufono na faaalia ae o le tulaga sao lena. I nei mea o Tulafono po o le a lava le... pe faaaoga le masculine in gender, ae o le tulaga foi e faasino foi i tina. O lona uiga la, e leai lava se tulaga foi lea e faasinasinolima pe faimea faapito i i, i le 1 amanaia o tina.

O le i ai o le failautusi, e pei o le agaga foi lele o le faamaumau, o la e aumai aloaia, e ala ona leai se palota, ona e i ai itu maotua o mea nei o le aafia o le CEO i tofiga. Ae manatua foi o tofiga o tofiga o Faamasino. E pei la o lea e maitau mai i lalo o le Faavae, a oo loa i tulaga o Faamasino, e tofi sao mai lava e Le Ao o le Malo, e oo lava i le Kapaneta e ave sao lava i Le Ao o le Malo, ina ia aua ne i tuuaia ua faapolokiki tofiga o i latou o Faamasino. Ia e faapena foi la i le mea o le maaaleale o mea nei o tofiga faa-Faamasino, e le tatau ai ona faia se palota a le CEO o le Faamsinoga i tofiga ia, ona e i ai le vatapuia, le vafealoaloai, le va o le CEO ma Faamasino e le talafeagai ai ona aafia le CEO i le tofiga o Faamasino lea e totofi e faatino le latou galuega faa-Faamasino.

Lau Afioga i le Fofoga Fatalai, e pei ua maea uma mataupu ia sa laga, ia a o lena ua maitau mai, o le tulaga lea ua oo i ai le Tulafono Tau Faaofi. E i ai foi finagalo ia sa faaalia e faatatau i le oooo o le leo o Faamasino i le tofia o mea nei o matai o aiga, e taua tele le manatu lea. Atonu o le manatu e toe tilotilo foi i ai i se isi teuteuga, ae pau lava le mea e faaeteete i ai, ina ne i te i ua tatou aafia i le tulaga o le faatinoga o le galuega ma faaiuga faa-Faamasino ae se i tilotilo i ai i le tulaga o le faatinoga o a latou galuega, pe ono aafia le latou tutoatas i se fautuaga faapea, ae lafo mai le finagalo ua faaalia.

Lau Afioga i le Fofoga Fatalai, o le faamaninoga na o mataupu sa laga e sui usufono sa sausaunoa i lenei Tulafono Tau Faaofi.

**FOFOGA FETALAI:** Malo faafetai.

*Na faamaonia le lafo ma faitauina le Tulafono Tau Faaofi o Teuteuga o le Faavae (Nu.2) 2018 i lona faitauga faalua.*

**Tulafono Tau Faaofi o le Komisi o Faiga Palota 2018**  
**– faitauga faalua**

**FOFOGA FETALAI:** E tusa ai ma le Mataupu 109 o le Faavae, o le a tuuina atu le Tulafono Tau Faaofi i le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae mo le iloiloina ma toe lipoti mai i le Fono Aoao ia le itiiti ifo i le 90 aso mai le aso lenei.

**TULAFONO TAU FAAOFI O LE KOMISI O FAIGA PALOTA 2018**  
**– faitauga faalua**

**Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga ma le Komisi o Faiga Palota):** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Komisi o Faiga Palota 2018 i lona faitauga faalua, ma ou te fia tautala faamalamalama i ai.*

*Faaluaina e le Minisita mo Aoga, Taalogia ma Aganuu ma le Minisita mo Fesootaiga, Faamatalaga ma Fesootaiga Vavave Faaneionapo.*

**FOFOGA FETALAI:** Ou te tapa lau Afioga e te saunoa faamalamalama.

**Afioga Hon FAAOLESA KATOPAU T. AINUU:** Lau Afioga i le Fofoga Fetalai ma le mamalu o sui usufono, o lenei Tulafono Tau Faaofi ua tuuina mai ina ia faavaeina ai le Komisi o Faiga Palota faapea matafaioi ma tiute o le Komesina o Faiga Palota faatasi ai ma lana Matagaluega. Ua faia lenei tulaga ina ia faavaeina ai le tutoatasi o le Komisi ma tuuina faatasi uma ai mataupu e patino i le Komisi o Faiga Palota sa tuuina i lalo o le Vaega 3, 3A, 3B o le Tulafono o Faiga Palota 1963. O le a maioio ai le Komisi, le Ofisa, ona tiute ma faiga faavae, faatinoga o faiga palota e pei ona patino i ai Tulafono o Faiga Palota.

O le sini autu lava o lenei Tulafono Tau Faaofi, o le faavaeina ai ma aiaia ai le tutoatasi o le Komisi o Faiga Palota, tofiaina o le Komisi o Faiga Palota ma lana aufaigaluega, aiaia mai ai faavae ma faavaeina ai le tulaga o filifiliga, faaleaogaina, faamavaega ma avanoa o tagata faigaluega o le Komisi o Faiga Palota.

Ae i ai foi le pulega ma tulaga o mea tau tupe o faiga palota, filifiliga o Komiti Faafoe ma le toe iloiloina o tuaoi palota pe a talafeagai; ma le mulimuli; soloia o le Vaega 3, 3A, 3B ma le 4 i le Tulafono o Faiga Palota 1963.

O le faamalamalama maina manino lea lau Afioga i le Fofoga Fetalai o le tuuina mai o lenei Tulafono Tau Faaofi, ina ia faatulafonoina ai le faavaeina o le Ofisa o Komisi o Faiga Palota ina ia manino ai ona tiute, matafaioi o le Komisi i le tofiaina o le Komesina, le Pulega ma le aufaigaluega. I le ava ma le faaaloalo.

**FOFOGA FETALAI:** Malo, faafetai. Ia, e i ai se sui usufono e fia saunoa?

**Tulafono Tau Faaofi o le Komisi o Faiga Palota 2018**  
**– faitauga faalua**

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fatalai e...

**FOFOGA FETALAI:** Ia tulai mai le sui usufono mo Anoamaa Sisifo, lau Afioga i le Matua.

**Tofa Hon LAUOFO FONOTOE NUAFESILI PIERRE LAUOFO:**  
Faafetai. E pupuu lava foi nai manatu e fia folasia i le Maota nei e tusa ai ma le Tulafono Tau Faaofi ua faapena ona tuuina mai e le Afioga i le Minisita. E momoli atu le faamalo, e faafetai foi i le Afioga i le Minisita i lenei tapenaga, ua manino foi lana saunoaga i vaega eseese. E pau lava ia o nai manatu e faataatia atu i autafa o le Afioga i le Minisita, o le taimi po o le umi lea o le konekarate e galue ai le Komesina, pe i ai se lagona foi lea e tatau ona sili atu i le 3 tausaga. O lea e manino ma malamalamā e pei o le taimi lava lena o lea e laugatasia uma ai taimi galulue o Faauluuluga o Matagaluega.

Aepeitai, e faavae sou manatu ona o le taimi foi lea o Paeaiga e tai 5 tausaga ona e i ai se lagona e manaia foi lele ona sopoia atu le isi faiga palota po o le isi Paeaiga i le taimi galue a le Afioga i le Komesina o Faiga Palota.

E faamauina le faafetai, o lea ua faatulai mai i totonu o le Tulafono Tau Faaofi le Komiti lea e toe iloiloina tuaoi o itumalo faa-palota ma ou te talitonu foi o se laasaga lelei lea mo le agai i luma. Ae pau lava se lagona e fia faaleo i le vaega lea lau Afioga i le Minisita, e manaia foi lele pe a faapea e ttau ai.. e lelei lava le fono pea pe a feiloi le Komiti lea a o lumanai ai le faiga palota faapea foi le taimi e tuanai ai le faiga palota. Ia pe leai lava se suiga o tuaoi, ae tau lava ina toe silasila i ai aemaise lava taimi e maea ai le faiga palota, ona o lea e aumai foi lea e le o faailoa mai se taimi e feiloi ai ma tulaga faapena.

E pei o le uiga lena o se lagona lau Afioga i le Fofoga Fatalai, ia e manaia lava a uma le faiga palota ma toe silasila i ai ia po o talafeagai po o lelei, pe toe fai foi nisi teuteuga. Ae faafetai mo le avanoa i lau Afioga.

**FOFOGA FETALAI:** Malo faafetai. Oi se matua lelei tele. Ia o le a tuu atu la i le Malo e saunoa. E i ai se isi sui usufono e fia saunoa?

Ia, tulai maia lau Afioga i le sui usufono mo Aleipata Itupa i Lalo. Tulai mai lau Afioga i le Matua.

**Afioga TAFUA MALUELUE TAFUA:** Lau Afioga i le Fofoga Fatalai, faafetai mo le avanoa. E le umi lava se tautalaga i lenei mataupu. E momoli atu foi le faafetai ma le faamalo i le Afioga i le Minisita ona o lenei Tulafono Tau Faaofi. Ma e sa tele foi lava nai au fesili i le taimi sa fai ai le tatou faatalanoaga i le Aso Gafua, ona o le popolega lava, atonu po o le faatamala lava o le sui usufono ia. Ia e le i faia sau submission i le taimi na avanoa ai, ae ui i lea, ua tuanai na taimi. Ae na o le 3 lava nai vaega ia ou te fia talanoa ai e uiga i le tatou Tulafono Tau Faaofi.

**Tulafono Tau Faaofi o le Komisi o Faiga Palota 2018**  
**– faitauga faalua**

O le vaega muamua, o le vaega foi lea e i lalo sa faatalanoa ai le Vaega 14, e le i auiliiliina le Tulafono Tau Faaofi lau Afioga ae pei o le agavaa o le sui foi lea tagata palota. E pei o le mea lava lea ua fai si mamafa tele i le faalogologo atu, o le le mafai lea ona palota lota uso moni po o lota tuafafine moni po o taita lava siblings pe a faapea e le o au o se sui. O lona uiga e na o le avanoa lava e tuu i le sui e tauva i le palota e mafai ona palota lona... tulou lona toalua, ia faapea foi ma lana fanau, pe afai e le o matai lona toalua i se isi itumalo.

Lona lua lau Afioga, o le a ou alu sese ai ia faapea, a o le a taatia nisi manatu seja oo i le taimi o le Komiti ona faaali atu lea ma le faaaloalo, faafetai.

**FOFOGA FETALAI:** Ia, tulai maia le sui usufono mo Palauli le Falefa, se tasi o sui usufono matua o lea Itu o le Maota.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai atu i lau Afioga i le Fofoga Fatalai mo le avanoa. Faafetai foi i lenei Maota ua tele foi Tulafono ua mafai ona faamaeaina i lenei aso. O le taua ia o le Tulafono Tau Faaofi lea i lou au sui usufono, ona o le vaega lea o Faiga Palota, sa i lalo o le Fono Aoao, ia ma na amata ai lea ona tuufesili lou mafaufau, pe tatau ona tutoatasi lenei Komisi pe leai, pe o lava ni galuega e fai e nei foi tamalii ma alo o le atunu o faigaluega ai.

E pei lava foi ona maua i saunoaga a nisi o sui usufono na saunoa nei aemaise foi o le faamalamalamaina o lenei Tulafono Tau Faaofi e le Afioga i le Minisita e ona le Tulafono Tau Faaofi, i le tulaga ua mafua ai ona fai lenei Tulafono Tau Faaofi, ina ia mafai ai ona tutoatasi le Komesina o Faiga Palota. Ou te le o vaai atu i i i le tulaga tutoatasi i le faafaigaluegaina o tagata, e pei e foliga lava o lea e i lalo o le faamalu a le Komisi o Tagata Faigaluega. Aua silasila foi lau Afioga ma le mamalu o lenei Palemene, ua i ai isi itutino o le Malo ua faamatuu i ai le tulaga lea tutoatasi e filifili ai e le Komesina po o le Pulega a latou lava tagata faigaluega, ona o le anoanoai foi o matafaioi ua feagai ma le Komisi o Tagata Faigaluega a le Malo, ae le gata i lea ua aveesea foi le CEO sa galulue faatasi ma le Taitaifono o le Komisi aemaise Komesina e toalua o lo o lagolagosua. O le tasi lena fesili i le Afioga i le Minisita pe a faamalamalamaina maioio lelei le upu tutoatasi, e pei o le tutoatasi lea e faitau atu i ai i le Tulafono, i galuega fai a le Komesina i le faatinoina o ona tiute i le tulaga e faatino ai galuega o faiga palota.

O le isi mea lea e le o taua i i, o le malosiaga po o le pule tuuina atu i le Komesina na te faia ai filifiliga o agavaa o sui tauva mo faiga palota. E ala ona ou faataua le mataupu lea lau Afioga i le Minisita, o au le isi sui usufono ua uma lelei palota ia ua tea atu e fa, e le misi ma faamsinoga, a o lea foi ua aumai lau Tulafono, e le gata i le Tulafono Tau Faaofi lea, a o le isi Tulafono lea e mulimuli mai.

**Tulafono Tau Faaofi o le Komisi o Faiga Palota 2018**  
**– faitauga faalua**

E le o faaititia ai avanoa e uma ae faiga palota, a ua faulalai faamasinoga i tulaga lava o tuuiga. E te silafia foi nei mea, e uma loa faiga palota faiaina le sui ona i ai lava lea o le loto le fiafia ma taumafai lea e saili ai lea o nisi mea e faaleagaina ai le igoa o le sui ua manumalo. Pei e tasi lena tuualalo, ia i ai le malosiaga i le Komesina e fai ai e ia faaiuga mo agavaa o sui tauva ma le toe o ai sui tauva i le faamasinoga, e tau mai ai, pe tatau ona alu tauva le sui pe leai. Aua afai na te le faia le mea lea, o lona uiga e le tatau ona Komesina o Faiga Palota pe a leai se malosiaga o i ai, o ia e iai le pule. A alu atu le tagata e fai lana tautoga, aua o le mea lea e i ai, e tauto ae le suesuea. Ou te fai atu lava au ia o au, o le faigofie ia o auala e suesue ai, ae ua o lava i tai ona o le leai o se malosiaga sa i ai. Sa i ai le malosiaga muamua ou te le iloa po ua lua po ua tolu Paeaiga talu ai ae te i lava ua mou malie atu.

Lau Afioga i le Minisita, tasi lena vaega o le taumafai lea o Tulafono, aua o lea o le a faatutoatasi lau Komesina o Faiga Palota, tuu i ai le malosiaga lea, aua lava ne i toe o ai ni sui tauva, po o ai lava i le Faamasinoga, aua o lana galuega lea. Ia e leai se isi e tele ni ana tupe, a o nei foi tupe, se i faaagaaga pe faasoasoa lelei aua nai toeaiaina ma nai olomatutua o la e omai e saili atu ni tupe e fesoasoani ai i le latou penisione ma tupe e tausi ai aiga ma tautua ai Ekalesia ma nuu. Ma o le tatou aganuu foi lau Afioga i le Minisita, e matua tele o tatou tuatuagia, a o a la tupe o le a fai ai pe a fai o le a ave uma i le faamasinoga? Ia na i ai foi isi tulaga o faatulagaga o totogi o nei mea o loia ia laitiiti, ae leai se laitiiti. Ou te iloa o lau Afioga ma lou ofisa le isi ofisa e masani ona tai \$200 i le \$300 i le itula pe a alu atu le tagata e faaulu lana tagi e ave ai se mataupu i le faamasinoga, ona o le tulaga faanatinati, o nei mataupu. Ou te tau manatua sa i ai foi se faaiuga a le Kapaneta sa fai i se isi taimi e tau faamama ai le pili a loia, a o le mea lea e i ai, e leai lava ma se loia e mama se pili. Ou te iloa e mama pe a na faapea e fai uma e le Komesina o Faiga Palota ma le Loia Sili e faaaoga ai o la Ofisa e fesoasoani ai i taitai o le a filifilia e le atunu, aua o tatou nei, a o nai o tatou uso ma tuafafine o lo o agai mai foi i le Palemene, o latou taeao. E pei la o le tatou matafaioi lau Afioga i le Minisita, sauni nei mo le lumanai o a tatou faiga palota, soia tatou te o soo i tai i le faamasinoga. Fai se tulafono e le toe molia ai, aua ou te iloa o le matou vaega uma lea e i faapena foi ma i ina, e leai lava ma se isi na oo uma lava i tai. A na le popoto la le isi vaega e fai faatoesega, ia o le mea e tupu, e te i lava ua toe o uma i faiga palota. Ua ou taua le vaega lea lau Afioga i le Minisita. Ou te iloa foi le Tulafono lea e teuteu nei, o au isi faamasinoga lea e fau ai le Tulafono lea, a o lea lava ou te vaai atu, e fau lava le Tulafono, ae emo ifo lava e alu i le faamasinoga. Mo le faataitaiga, se i ou lauga atu ia i le isi mea lapoa lea e i i, o le faatutoatasiina o le Komesina o Faiga Palota, ou te lagolagoina. E manaia pe a silasila foi i le umi o lana konekarate, aua afai nei ae pasia le Tulafono lea ma toe tofia le o lo o iai nei, e oo atu i le taimi e fai ai le faiga palota i le 2021, toe tolu vaiaso uma lona term. O lona uiga, na ona uma lava ua uma le term, ia e le iloa pe toe faigaluega pe leai, a o ai la e faaauauina. Se i silasila i ai i le vaega lea pei ona taua i finagalo o nisi o sui usufono.

**Tulafono Tau Faaofi o le Komisi o Faiga Palota 2018**  
**– faitauga faalua**

O le tulaga lava i le faagasologa, o lea ou te vaavaai atu i le tulaga o le Sui Komesina, po o le a le level lea e i ai i le tulaga, aua a fuafua i le vaega o le tatou Ofisa o le Fono, e i ai le Deputy. A silasila foi i le Pule ma Suetusi Sili, e tatau ona i ai le Deputy. Ia po o fea la pe fai se Deputy pe leai, aua a faapea o lea o le a faatulaga i i le Sui Komesina i le taimi pe maliu ai le Komesina, aua tatou te le iloa pe lavea i se taavale, pe te i foi ua oso lona mai fatu po o le leaga foi o ona fatugao, o le mea la lena tatou te le iloa. E le taumasina se isi ma le finagalo o le Atua, ae tatou sauniuni, aua e ui lava ina laitiiti sia foi tamalii, e le o le laitiiti po o le matua e valaau ai agelu i luga i lau Afioga, e pei foi o lau Afioga i le Minisita. Ae ou te faamalo mo le Tulafono Tau Faaofi, ou te lagolagoina, ae o nai teuteuga na o lea e tuuina atu, aua a faapea o le a tuuina atu i le Komiti, ou te iloa o nai teuteuga laiti ia lau Afioga i le Minisita e ono faafaigoifie ai le faagasologa ma le tatou matafaioi. Ma lou faaaloalo lava. Manuia le tatou Fono lau Afioga i le Fofoga Fetalai.

**Afioga SULAMANAIA FETAIAI TAUILIILI TUIVASA:** Faafetai mo le avanoa i lau Afioga i le Fofoga Fetalai. E tulai foi e fai se sao o lenei itumalo ona o le Tulafono Tau Faaofi ua opea nei i le Maota. Ou te lagolagoina lenei Tulafono Tau Faaofi, ou te faafetai ai i le Afioga i le Minisita aemaise foi o le Sui Minisita, aemaise foi o le Ofisa Sili ma le Pulega a lenei Matagaluega o le Malo ua mafai ona aumai lenei Tulafono Tau Faaofi ina ia faatutoatasi ai le Komesina o Faiga Palota. Faafetai lava i le Minisita, e pei foi o lea na malele le Palemia ananei, o le Tulafono lea o le Faavae sa faavae atu e le Minisita o Faiga Palota. O le mea lena sa avatu ai le 250% a le sui usufono mo Salega Sasae ona faapea a ia o le Tulafono a le Toeaina, ae leai o le Tulafono a le Minisita mo Faiga Palota.

E lagolago e le sui usufono mo Vaimauga Sasae le Tulafono ona e le gata o le Minisita o le sui usufono mai Vaimauga, aemaise foi....

**FOFOGA FETALAI:** Se i tulai mai le sui usufono mo Salega.

**Tofa Olo Fiti Afoa Vaai:** Lau Afioga i le Fofoga Fetalai, ou te manatu ua leva ona tea le tulaga lea na saunoa i ai le sui usufono mamalu, ae o au e le faapea ou te tetee uma i Tulafono a le Malo. E i ai foi lava Tulafono ou te auai, ae o lea ou te faalogo atu e sao le mea lea e saunoa i ai le sui usufono mo Vaimauga Sasae. Ou te faamalie atu i lau Afioga, toe aveese mai le isi 100% o lau 200% lea na avatu. Ma le agaga faaaloalo.

**FOFOGA FETALAI:** Tulai mai le sui usufono e faaaauau le saunoaga.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai, o le mataupu i le Tulafono Tau Faaofi, ou te faafetai i le Minisita aemaise o lana Minisita Lagolago. Na taunuu atu loa le tama lea e Minisita Lagolago vave loa ona tuuina mai le Tulafono Tau Faaofi.

**Tulafono Tau Faaofi o le Komisi o Faiga Palota 2018**  
**– faitauga faalua**

O le agaga foi lena o le Malo, ia vave ona tuuina mai nei Tulafono i totonus e tapena i ai tatou, aua o le Matagaluega lava lenei pe a faatumaoi le Ofisa o le Komesina o Faiga Palota, e leai lava se manatu o le sui usufono mo Vaimauga e faaali tele i ai, aua o teuteuga ma mea uma ua tuuina mai, aua nisi sui o le atunu e agai mai luga. A o tatou, e moni lava o Tulafono ua tatou faatinoina, ae toe lavevea ai foi tatou mo le agai i luma. O lea la ou te lagolagoina ai lenei Tulafono Tau Faaofi.

Na pau lava le talosaga i lau Afioga i le Minisita ma lau Minisita Lagolago, o le tulaga foi lea i le PSC, o lea e i ai le Tulafono lea sa afaina ai foi lenei sui usufono ma so o se sui lava o le PSC e fia tauva i le faiga palota, e tatau ona e faamavae. O le popolega lea e i ai le sui usufono, a e faamavae faamavae ma lou tulaga i lau galuega i le Matagaluega a le Malo ae e le malo, o fea la o le a e alu i ai? Ona e toe foi atu lea i lau Matagaluega ua le fafia le Pule au foi o lea ua e faamavae. Ia o popolega na o le sui usufono aua o lea e vaai atu i le Matagaluega, sa tatau ona i ai se malosiaga i le faiga palota e taatia ai lea vaega i le PSC, tuusaunoa pea nisi sui o lo o i totonus o Matagaluega a le Malo e omai e fia tauva aua o lea e afifio mai nisi o tamalii o Faauluuluga na fia tauva foi i lenei tulaga tofi, ae o le faalavelave, o le tulaga lea e noanoatia ai ona e tatau ona e faamavae. E lelei lava la le foi atu a o la e lelei le Pule ma le lua mafutaga, ae a foi atu e matua le fafia lava le Pule, o fea o le a e agai i ai? Na pau lava lena o se vaega e fia talosaga atu i le Afioga i le Komesina pe mafai ona tuu i ai lea vaega i totonus ina ia tuusaunoa ai pea nai sui ia e fia omai e tauva.

Ia na pau lena o le lagolago a lenei itumalo o Vaimauga Sasae e avatu i le Tulafono a le Minisita ma le Minisita Lagolago aemaise o le Komesina o Faiga Palota.

**FOFOGA FETALAI:** Malo. Tulai mai le sui usufono mo Falealili Sisifo. Faapuupuu mai saunoaga ina ia mafai ona tali nei mataupu sa laga.

**Tofa AUMUA ISAIA LAMEKO:** Faafetai i lau Afioga i le Fofoga Fatalai mo le avanoa.

E muamua ona momoli le faafetai ma le faamalo i le Afioga i le Minisita e ona le Tulafono ua mafai ai ona faatutoatasiina le Ofisa o le Komesina o Faiga Palota. Na pau lava se vaega e avatu ai se tuualalo ona i lalo o le Tulafono o lo o i ai le Komiti lea latou te iloiloina tuaoi o itumalo pe mafai ona silasila e tuu i ai le Loia Sili a le Malo as a compulsory member o le Komiti lea.

O le vaega lona lua lau Afioga, atonu o lea ua manino i le Tulafono o lea ua talafeagai le tolu tausaga lea ua tuu i ai mo le tofiaina o le Komesina e pei foi o le tofiga o le Loia Sili e tolu foi tausaga. A silasila foi la i vaega uma o le Tulafono, o lea ua mafai ona faatutoatasi le Ofisa lenei o le Komesina i le faafaaigaluegaina, le puleaina ma le faamaloloina o tagata faigaluega e fuafua lava i le Tulafono Faatonutonu po o Regulations sa faataatia mai e le Matagaluega.

**Tulafono Tau Faaofi o le Komisi o Faiga Palota 2018**  
**– faitauga faalua**

Ia o se manatu puupuu lea o lenei itumalo e lagolago ai le Tulafono Tau Faaofi ua taatia i lumamea nei. Faafetai.

**FOFOGA FETALAI:** Malo faafetai saunoa. Ia, tulai mai le sui usufono mo Faleata Sisifo ona tali loa lea o le Malo i le Afioga i le Minisita.

**Tofa LEALAI PULE RIMONI AIAFI:** Faafetai i lau Afioga mo le avanoa. Faafetai foi i le Afioga i le Minisita ma le Matagaluega mo lenei Tulafono Tau Faaofi.

O le Tulafono lenei o Faiga Palota, faatoa aumai lava pe a toe fia masina pe tolu, fa masina fai le faiga palota, ona o le mautinoa ai lava lea o sui usufono, confused i tausaga taitasi. Ae faafetai o lea ua vave mai ma lava le taimi tatou te tapena ai ma i ai nai suiga talafeagai a o lumanai ai le isi faiga palota.

E fia fai lava se manatu i le Tulafono Tau Faaofi lenei ona o le taua tele, lea sa laga foi e se tasi o sui usufono matua o le Maota. E faigata ona malamalama tele i ai sui usufono e le i oo i le faamasinoga, a o sui ia e faamasino pea i faiga palota, o au e le i misi se faiga palota. Ae na pau lava le mea o le malo ai foi, malo soo. E le lelei, e le talafeagai. A tatou vaa i lalo i lalo o galuega faatino a le Komesina, o lena e pito lava i luga i lana matafaioi le filifiliina o sui usufono mamalu o le Palestine. O lona uiga ua tatau ona ia te ia le malosiaga atoa e taofi ai le tagata e le tatau ona agavaa ma ave ai le ioega e tauva ai le sui usufono e tatau ona tauva. Sa fai lelei le matou submission i le mea lea i le Komisi, ave i ai le matou... sa matou fai manatu i ai i le vaega lea. O se mea le talafeagai tele le sue fua e le isi sui tauva o le isi sui tauva i lona agavaa, a o le galuega patino lea e tatau ona fai e le Komesina o Faiga Palota. Afai ae i ai se sui e le fiafia ai, o lona uiga e tatau ona agai lana sue i le Komesina o Faiga Palota. E le tatau ona... o lea e matua tele le afaina talu ai, ua oo ai ina fevaevaeai nisi o afioaga ma nisi o sui tauva, ae le o se mea lea e tatau ona tupu. Ou te le iloa foi po o le a le mea na ala ai ona sui, a o le isi faiga palota muamua sa ou tauva ai i tua atu ma isi, o le matafaioi lava lea a le Komesina e fai, a alu atu lava e le faamalieina le Tulafono, taofi ai i ina, e le mafai ona e alu i le faiga palota, uma. Ae tatau ona toe tagai lau Afioga i le Minisita i le vaega lea, ina ia taofia lea vaega ae faatino le galuega a lau Matagaluega e tatau ona fai.

Lona lua lau Afioga, o le mea lea na sui ai le term a le Suetusi Sili a le Malo lea ua tuu tai ono tausaga, o le isi mau maumaututu na ala ai ona faaono tausaga, ina ia overlap, ia ova atu i le term o le Palestine, ia aua ne i i ai se aafiaga faapolokiki. O le mea foi lea e tatau ona i ai, i lou talitonuga term o le Komesina o Faiga Palota. E tatau foi ona tuu tai ono tausaga i lou talitonuga, ina ia aua ne i i ai se aafiaga, ma ia lava ai lona taimi e tapena ai le faiga palota mai le isi palota i le isi palota. Ae le gata i lea, ia matua manino, e tatau ona i ai se Sui Komesina, Deputy, e galulue faatasi i le faiga o le mea lenei, ia aua ne i faatutusaina ma isi Matagaluega a le Malo.

**Tulafono Tau Faaofi o le Komisi o Faiga Palota 2018**  
**– faitauga faalua**

Ma o le mea foi lea ua ou vaai ua toe agai i ai le Komisi o Galuega a le Malo ma toe vaavaai vaega ia i Sui Pule, ua le work foi lea mea na fai, ua abuse tele lea mea ua fai nei, ua tai 20 ACEOs a isi Matagaluega a ua leai ni mea e faia. Ae manaia le toe faamanino o le Tulafono Tau Faaofi e fesoasoani ai i le tatou Tulafono mo le agai i luma.

Ia o nai manatu ia ma le faaaloalo lava. Faafetai.

**FOFOGA FETALAI:** Malo faafetai. Ia tulai mai le sui usufono mo Faasaleleaga Nu.2.

**Afioga PAU SEFO TAUMATA PAU (Faasaleleaga Nu.2):** E momoli atu lau lagolago i lenei Tulafono Tau Faaofi. Faafetai foi i le Afioga i le Minisita e tusa ai ma le Tulafono. A o nai fautuaga ia pei foi ona faalogologo atu i nisi o saunoaga i le agai lea pe a mea le faiga palota i le faamasinoga. Ma e le po ma e le lilo foi o lenei sui usufono ua molia faafa i le faamasinoga, ma ou te talitonu foi e leai se malosiaga tele foi o le Minisita ma le Komesina o le a tutoatasi e foia ai lea mea o le o i tai i le fale faamasino pe a uma faiga palota. A o lo o faafogafoga mai foi si ou itumalo, na amata lava ona ou sau lava i lenei tofi o faamasino lava, e oo mai lava i le taimi nei sa molia lava au i le Tulafono ona o mea foi nei e le mafai ona le talia le mea e manao ai.

Na pau lava le fautuaga i lenei Tulafono Tau Faaofi, o le a le mea... a uma loa le molia faafa, ona faataga loa lea o le sui usufono e sa ne i toe molia pe afai e sao mai i le isi faiga palota o lo o sosoo ai, ina ia taofia ai ona fai lea tulaga o le faamoemoe e molia tagata. A leai i le fa, ia po ua lava foi le lua ona faataga loa lea ma e le toe mafai ona toe molia. Aua ana i ai lena Tulafono i lena taimi, masalo pe na o le faalua lava ona molia au e le toe moliaina au e oo mai i le aso lenei ma lenei Paeaiga.

Ia o se fesoasoani atu lena i lenei Tulafono Tau Faaofi, ae lagolago e lenei sui usufono le Tulafono e pei ona aumai i luma o le Laulau a Fono.

**FOFOGA FETALAI:** Malo. E manaia le faalua ae leaga le faafa ua tele foi le fa. Ia, tulai maia lau Afioga i le Palemia.

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai e i ai nai mataupu ia sa laga o mataupu e aofia ai faiga faavae a le Malo e tatau ona ou tali atu i ai. Ma o faiga faavae nei e agai i tua atu o le Paeaiga lenei. O le taua ia o finagalo faaalia, e taua tele, ma le isi mea e faataua ona o le tatou Tulafono e alu i le Komiti o Tulafono Tau Faaofi, e tele lava la le taimi e tagofia ai finagalo ia ua aumai, ona o finagalo e aofia uma ai tatou ma e anoa tele sao ua faatino i le aso i le auala e tuuitiitia ai lenei mea o le felauai i luma o le Faamasinoga.

**Tulafono Tau Faaofi o le Komisi o Faiga Palota 2018**  
**– fatauga faalua**

A o lou tulai atu ona o lea sa matua fesiligia lava le tulaga po o le a tonu lava le uiga o le tutoatasi. E tatau ona tutoatasi le Matagaluega. O le mea lenei o le tutoatasi i le faasolo maiga o le Malo, sa leai ni Matagaluega e tutoatasi, sa i lalo uma lava o le Pulega a le PSC, le Komisi e Pulea Galuega a le tatou Malo, i luga o le talitonuga o i lea e alu atu ai faiga faavae e faalaugatasia uma ai Matagaluega. A ua alu alu alu, i luga o le faagaulemalie o nisi o Matagaluega, ae na amata atu i le Matagaluega lenei a le Maota Fono, i le tulaga foi lenei ua le mafai ona ioe mai le PSC i nisi o talosaga mo tagata faigaluega e moomia. Muamua, lua, ma o latou totogi e tatau ona sii maualuga, ae taofiofi pea le PSC i lena taimi. O le vaaiga a le PSC, e leai se mea o le a fai faapitoa ai se Matagaluega e tasi, e tatau ona mulimulitui pea i luga o le fua faatatau o mea nei o totogi e vasaga lelei ai totogi o tagata faigaluega.

O lona lua, e tatau lava ona tasi le Pule e matua iloilo totoa ai le taua ma le le taua o se talosaga, aua o le agaga lava lea na tupu ae i le Faauluuluga o le Matagaluega a manao loa e hire nisi hire, ae ono faigofie lava ona faatino e i latou o lea e galulue. A o le faalavelave, e pei e i ai le tulaga augata e toe faatulaga tiute, toe tufa tiute i totonu o le aufaigaluega o lo o i ai e oo mai lava la i le taimi lenei. Mo sina faataitaiga; ina ua faatu le vaega lea e vaaia mea nei o tatou Faalapotopotoga foi nei tumaoti, e toalaititi lava e na faia le galuega i le Ofisa o Tupe, na ona faatu lavafefete loa ma le Matagaluega, ua tele tagata, faitau miliona ma miliona le budget. E oo foi la i le SQA, na manatu lava e toalaititi tagata e tatau ona faatino. A o le a le mea ua tupu? Oka oka e se Faalapotopotoga. E te ofo ai po o a latou galuega o fai. A o le uiga ia o CEOs, o mea o empire builders. E tu loa le CEO manao e matua faafefete le organisation. A o le fesili; o faaaoga tatau le aufaigaluega? A suesue manino i ai, e le o faaaogatatauina. O mea ia sa matua faaeteete i ai faigamalo ma le PSC. Ae talu ai o le talosaga na alu atu i inei i le Maota Fono o lea e i ai le Pule, pei o i ina lea na gau ai le finau a ua alu atu i se tulaga foi lea faamalosi.

O le ala foi la lena i le taimi na faatulai mai ai le Tulafono o le NPF i le matua tele o tetee i le taimi lena. O au le isi sa aafia i le taumafaiga ina ia talia le Tulafono a o ou galue ai i le Matagaluega o Tupe i le 1972, ae tasi lava le mea e ono le pasia ai le Tulafono, o le pule a le Palemene, le pule a faipule. A o faipule, e matua le fiafia lava i nei mea o le toesea o tupe e fai ai latou NPF. O le a la le mea na tupu? Na fai ai loa lea o le aiaiga faapitoa, na o faipule lava a uma loa le latou taitolu tausaga tala i tua le NPF. Ia lena la na faigofie ai ona pasi. Aua foi e tuuloloa a isi seilogia e le tai 55 tausaga, a o faipule, e tolu a tausaga, le mea o lo o i ai le power. I lou lava taofi, o uiga foi na sa fai i na onapo, lea na faigofie ai ona pasi le Tulafono. O le a la le mea ua tupu? Ua fiafia lava faipule e uma le tolu tausaga tala atu NPF o fai ai a latou faatosina, tele ai ma faamasinoga mulimuli ane, ia, o isi tootutuli i isi. Lea la e sao ai le tala a le faipule lea na fai nei i le taeao, o le popoto o isi e faatoese, lea na le oo ai i tai i le faamasinoga. A o ai e faia ia mea? O tatou lava o faipule.

**Tulafono Tau Faaofi o le Komisi o Faiga Palota 2018**  
**– faitauga faalua**

Ona oo loa lea ina mafaufau mafaufau, se i fofo le mea lea, o le tulaga foi lea o le mataga o le mea lea e i ai, tala i tua i le faaiuga o le tolu tausaga, tala i tua i le tolu tausaga o fai ai oo. Ona fai ai loa lea o le iuga a le Vaega lenei, e mataga tele lenei mea o le uma atu o le tofi faipule.. Ou fesili atu i le isi faipule, o le a alii lau mea o fai nei, o lea ua e le toe faipule? Ae fai mai le sui lea o Lufilufi, oi o le a foi se mea, o lea ua ou ola i le tootoo. Ou fai atu, -se i faamatala mai ou te fia malamalama o taua uma o Lufilufi?ø Fai mai, -e oo loa i le taeao ua uma ona fai lau meaai ou tago loa i lou tootoo ma lou fue, fai loa lou laei ou tago atu to mai le mea foi lea o le siapo, ia ona ou valaau loa lea i le taxi ou alu i Mulinuu. Ia na ona uma lava o lea faamasinoga tu ma lou tootoo.ø Ia o lea la ua ola i le aisi. Mataga tele mea na fai e faipule i na ona po. Ia ona saunoa mai lea o Tofilau i le matou Vaega, tatou faia ia se mea se i litaea atu ai faipule, ona maua ai lea o se mea e litaea ai. O lea la e fai ai nei le tatou penisione. Ua ou faamatala atua le taua o le mea lea. Ua oo loa i le taimi e tala ai le penisione, ia, ae tau mai le mea, ua tala uma lava i tua penisione, ae toe toalua lava faipule ia e totoe e le i talaina i tua penisione, toe o au ma le isi Minisita o lau Kapaneta. Ia ua toe alu alu alu, toe oo i le taimi lona lua, toe tala uma foi. O lea la ou te manatunatu o le a tamau ina ia aua ai ne i toe o i tua, ina ia aua ai ne i toe o e faalavelave i faamasinoga a tagata i Mulinuu, le mea lea o le faipule ae aisi.

O le tulaga lea na mafua ai lea ou te faamatala atua le mea lea lau Afioga i le Fofoga Fetalai, o mea o faaiuga fai i le taumafai e faataoto faavae ina ia aloaia ai faiga faavae mo le agai atu i le lumana, lea la na taoto mai ai le tutoatasi. O lea la ua tutoatasi lea Ofisa, tutoatasi foi leoleo, a o le tala la, o le fesili; o aoga la lea tutoatasi? O le tali, o le tala a le Tusi Oti, e matua leai lava ma se aoga. Aisea? Aua foi o lea ua taoto le tulaga o le vasaga o totogi, o lea ua taoto. E le mafai ona pule lava la outou Matagaluega ma soona ta sii totogi, e matua leai lava ma se aoga o le mea lea o le tutoatasi. O lea ua taoto. Lona lua, e faapefea tofiga, e tatau ona faatalitonuina le Matagaluega o Tupe pe tatau ia tofiga, ma faatalitonuina le Kapaneta. O lona uiga o lenei mea o le tutoatasi, ioe o lea ua tutoatasi, a o le tala i le Tusi Oti. O lea ua agai le Kapaneta i mafaufauga nei, atonu o le isi lea Reform tele o lo o faamalumalu mai, ina ia toe teuteu ia tiute fai o le PSC, agai latou i le tulaga o le training, ae alu le tausaga o pisi ai i le faatinoina o aoaoga tau Pulega, ia malamalama lelei tagata faigaluega i o latou tiute. A o le mea lea o le tofiga ma le faatulagaina o totogi, o lea ua i ai le tatou Tribunal e faatulagaina totogi. E leai se mea e toe oo fua i ai le PSC. A o i foi la i le tofiga o le tagata, gafa pea le pulega a le Matagaluega latou te faatinoa mea ia, fuafuaga ia o lea ua taoto nei, ua amata faatalanoa e le Kapaneta. Ma o le isi lena Reform tele lea e faamalumalu mai luga, e leai se isi taimi e faatino ai mea ia, Paeaiga a le Palemene lenei e faatino ai mea faigata nei, mea e ono aafia ai le Teuteuga o le Faavae. Lau Afioga i le Fofoga Fetalai, o le tulaga lena, a o lea lava ua aumai e faatutoatasi pea i lenei taimi. I le tulaga o le agai i le lumana, e i ai lava e faatino ia Teuteuga ia ona sologa lava lea i le lautuatou ia le faamoemoe.

**Tulafono Tau Faaofi o le Komisi o Faiga Palota 2018**  
**– faitauga faalua**

O le vaega lona lua, o le fesili lea na aumai i le faamavae. E tasi lea faiga taua na faataoto e le Kabeneta, i tua atu ae le i afio mai le Afiofa i le Minisita o lo o i ai nei, o le ala lea o lou tulai atu ai, leaga o faiga faavae a le Malo. O le tulaga o mea nei o le faamavae o le sui ae le tatau ona toe alu i le faiga palota. Ni a fa, ae toe foi mai le sui lena ae galue i totonu o le PSC ae talosaga atu se isi o le nuu o le isi sui sa la tauva, pe alu atu se isi o le uso o le sa lua tauva, ua tele mea faapena ua tutupu, e faaaoga loa i i le tulaga o le fai ma se e tau i ai. O le Malo lenei, o lo o taumafai lava le Kabeneta ina ia tau faatonutonu ia vaega e ono sao mai ai, ia le faailoga tagata. Lau Afiofa i le Fofoga Fetalai, o le itu lena ou te toe faamanatu atu, o lea tatou te i ai i le tulaga aoao, a uma ona see atu lea o le tulafono lenei i le Komiti latou te iloiloina, ma e ono tele lava ia ni teuteuga e aumai e latou nei sa sausaunoa, leaga e ttau uma lava manatu ia na aumai nei. E toe tilotilo i ai le Komiti ona aumai ai foi lea i le vaitele lenei e tatou te soalaupule ai ma faatino le teuteuga ua tatau ma talafeagai.

Lau Afiofa i le Fofoga Fetalai, o le faamalamalamaga lena o le vaega tau faiga faavae o le Malo e pei ona aumai ai le fesili.

**FOFOGA FETALAI:** Malo faafetai. Pe i ai se isi faaopoopoga lau Afiofa i le Minisitaí

**Afiofa Hon FAAOLESA KATOPAU T. AINUU:** Lau Afiofa i le Fofoga Fetalai, o lena ua tali atu le Palemia i mataupu sa laga e sui usufono.

Ma le faaaloalo lava.

*Na faamaonia le lafo ma faitauina le Tulafono Tau Faaofi o le Komisi o Faiga Palota 2018 i lona faitauga faalua.*

**FOFOGA FETALAI:** E pei lava ona saunoa le Afiofa i le Taitai o le Malo, o le finagalo lava o le Malo ia faapena ona maua avanoa e sui usufono mamalu, o le mafuaaga lena ua finagalo ai le Malo.

E tusa ai ma tatou Tulafono Tumau, o le a tuuina atu le Tulafono Tau Faaofi i le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le iloiloina ma toe lipoti mai i le Fono Aoao i le Fonotaga e sosoo ai.

E tele avanoa e mafai ai ona maua ai e sui usufono e toe faaali ai nisi finagalo, e ala i le tuualalo ma le fautuaga.

Talu ai ona o lea ua tatou taunu i le tatou taimi manava o lenei aso e faamuta ai la tatou galuega ma siui o le Fonotaga. Ua i ai le manatu o le a faaiu le tatou Fonotaga i le tatalo e saunia mai e le sui usufono mo Falealili Sasae.

*Na tolopo Tauualumaga a le Fono Aoao i le itula e 12:54 i le aoauli, seia aulia le itula e 9:00 i le taeao o le Aso Faraile, 23 Mati 2018.*